

四庫全書

經部

欽定四庫全書

欽定春秋傳說彙纂卷十六

庚襄王二十一年

二十有九年

晉文五年齊昭二年衛成四年蔡莊十五年鄭文四十二年曹

共二十二年陳共公朔元年杞桓六年宋成六年秦穆二十九年楚成四十一年

春介葛盧來

介杜注在城陽黔陬縣今山東萊州府膠州西南七十里有黔陬城古介國也案黔

陬有東西二城東城秦置即介亭其在高密境者乃後漢時所遷之西城也

左傳

介葛盧來朝舍於昌行之上公在會饋之芻米禮也

昌行杜注魯縣東南有昌平城今在山東兗州府曲阜縣東南八十里

公羊

何以不言朝不能乎朝也

穀梁

介國也葛盧微國之君未爵者也其曰來卑也

集說

杜氏預曰葛盧介君名不稱朝不能行朝禮劉氏敞曰介葛盧者何附庸之君也其言來何

來朝也

公在外則何以言來接馬爾陳氏傳良曰介一歲再

小國也

不言朝公在會也

至其意將安在乎故亟書之

介人侵蕭譏有以來之也

公至自圍許

集說

張氏洽曰其致以圍許久役而不能服也趙氏鵬飛曰公會于溫朝於王所今其至也乃以

圍許至何哉志其實也至自會則若無功至自京師則實不至故以圍許至也

案汪氏克寬謂此年僖公不以王所致而致圖許亦猶成十三年如京師會伐秦不以京師致而致伐秦皆以著其本心不在於尊王其說非也汪氏於齊桓圖鄭固嘗與晉文圖許並稱矣以為齊桓圖鄭所以討其逃首止之盟晉文圖許所以討其不會踐土河陽之朝圖非美事而桓文之圖實為王室計故晉文遂圖許與齊桓遂救許書法無異朱子所謂春秋明王法而不廢五霸之功意蓋謂此既以為為王室計忽又以為意不在尊王一人之言前後互異此豈可以釋經也哉三傳而外辭義違背者皆刪而不駁緣汪氏此說為大全所採又世之學者承襲已久故為辯之如此

夏六月會王人晉人宋人齊人陳人蔡人秦人盟于翟

泉

會上公穀有公字翟亭歷反公作狄翟泉杜注洛陽城內太倉西南池水也今古城在河南府洛陽縣

東北二
十里

左傳

夏公會王子虎晉狐偃宋公孫固齊國歸父陳轅濤塗秦小子憖盟于翟泉尋踐土之盟且謀

伐鄭也卿不書罪之也在禮卿不會公侯會伯子男可也

胡傳

案左氏公會王子虎晉狐偃宋公孫固齊國歸父陳轅濤塗秦小子憖盟于翟泉則皆列國之

貴大夫與王子而公與會也其貶而稱人諱不書公何也翟泉近在洛陽王城之內而王子虎於此下與列國盟是謂上替諸侯大夫入天子之境雖貴曰士而於此上盟王子虎是謂下陵而無君之心著矣故以為大惡諱公而不書諸國之卿貶稱人而王子亦與焉者此正其本之義也

集說

杜氏預曰魯侯諱盟天子大夫諸侯大夫又違禮盟公侯王子虎違禮下盟故不言公會又皆

稱人劉氏敵曰是稱人皆微者與非微者也其稱人何翟泉在王城之內諸侯之大夫入天子之境雖貴曰士陪臣也而盟於天子之側自此始是以貶也程子曰晉文連年會盟皆在王畿之側而此盟復迫王城又與王人盟強逼甚矣故諱公諸侯貶稱人惡之大也陳氏傅良曰此晉初以大夫盟王子也向也踐土之役王子虎不書蒞盟也今以大夫盟王子文公之志荒矣大夫之交政於是始文公為之也不斥言王子虎為尊尊諱也以其人王子虎不可不偏人諸侯之大夫以其偏人諸侯之大夫不可不沒公也黃氏仲炎曰以大夫敵王人則諸侯敵王矣趙氏鵬飛曰洮之盟齊桓盟王人而無貶辭蓋以諸侯會王人為敵也翟泉之盟晉盟王人皆貶書人以大夫而抗王臣是待已與天王均也故皆貶書人此春秋重輕之義蓋顯矣吳氏澂曰盟不寒則不必尋也踐土之盟有齊宋蔡鄭及後至之陳今齊宋

陳蔡皆在而鄭獨不至鄭已怠於從晉矣蓋文公既
歸衛侯而又執之筮史受曹伯之賂而後復之合十
一國以圍許諸侯皆不用命而許竟不服蓋其所為
煩擾繆戾已失諸侯之心威重挫損漸起諸侯之慢
鄭之急於從晉當自反矣而即謀伐之是不以德義
懷人而專以威力脅人與齊桓異矣故明年圍鄭卒
不能得鄭也嘗謂齊桓之伯至葵丘之盟極盛而後
漸衰晉文之伯惟踐土之盟一盛而即漸衰矣李
氏庶曰晉文公三大盟會踐土王實自勞非晉之罪
于溫召王事雖逆而情順故皆諱之以存其尊王之
名若翟泉則群聚於王都之側上與王子虎敵血以
約言既非踐土子虎涖盟之比又無于溫懷自嫌之
心春秋不得不重貶之以顯其慢王之實矣汪氏
克寬曰春秋內諱公而外以微者書惟于齊翟泉二
盟為然于齊之盟柰中外之辨也翟泉之盟無上下
之分也故皆變文以謹之也或謂左氏記事多浮夸

而失實安知非微者之相為盟乎是不然于洮盟王人而列國之君同敵焉有七國之微者而敢偃然盟王人於王城之內哉陳氏際泰曰桓公會不通三川文公則盟翟泉矣桓公不以大夫抗王人文公則使大夫矣

案先儒皆依左傳謂列國大夫貶而稱人程子獨謂諸侯貶而稱人不知何據疑是文誤

秋大雨雹

左傳

為灾也

胡傳

正蒙曰凡陰氣凝聚陽在內者不得出則奮擊而為雷霆陽在外者不得入則周旋不舍而為

風和而散則為霜雪雨露不和而散則為戾氣疇霾陰常散緩受交於陽則風雨調寒暑正雹者戾氣也

陰膏陽臣侵君之象當是時僖公即位
日久公子遂專權政在大夫萌於此矣

集說

高氏閏曰劉向以為盛陽雨水溫煖而濕熱陰
氣背之不相入則轉而為雹盛陰雨雪凝滯而

冰寒陽氣蕩之不相入則散而為霰故雹者陰膏陽
也霰者陽薄陰也春秋不書霰猶不書月食也趙

氏鵬飛曰天地之大經曰陰陽而已天下之大勢曰
治亂而已天地之變霜雹雨暘日食星隕水旱癘疫

皆不離乎陰陽而人君之政德刑禮樂視聽言動仁
虐善否皆係乎治亂作於下則應乎上政治則陰陽

和政亂則陰陽沴和沴之應顧人君所行如何爾大
雨雹陰勝陽也雖天地之應不可俄而測然求其類

而推之則君不君而臣逼君德不修而刑勝德剛不
立而柔侵剛夫不制而婦抗夫者皆陰勝陽之類也

春秋之世其類實繁不可以一二考也經書大雨雹
者三皆著陰勝陽之罰爾汪氏克寬曰僖公頗能

勤於政事以銷天變故及末年始有失政之漸遂為
文公縱權之張本若昭公則昏懦不立怠於國政即
位之初而公室四分政權盡失卒不免乾侯之辱
天之示人顯矣 李氏本曰不書月日闕文也

案傳公之世季友子無佚不見於經傳
胡傳以季氏世卿為大雨雹之戒誤矣

冬介葛盧來

左傳

以未見公故復來朝禮之加燕好介葛盧聞牛
鳴曰是生三犧皆用之矣其音云問之而信

集說

何氏休曰前公圖許不在故更來朝
孫氏復曰一歲而再來非禮之甚

辛襄王二
年十二年

三十年

晉文六年齊昭三年衛成五年蔡莊
十六年鄭文四十三年曹共二十三

年陳共二年杞桓七年宋成七
年秦穆三十年楚成四十二年

春王正月

夏狄侵齊

左傳

晉人侵鄭以觀其可攻與否狄間晉之有鄭虞也夏狄侵齊

胡傳

左氏曰狄間晉之有鄭虞也遂侵齊晉文公若移圍鄭之師以伐之則方伯連帥之職修矣上

書狄侵齊下書圍鄭此直書其事而義自見者也

集說

高氏開曰狄之侵齊自背其盟也齊桓召陵之後書狄侵齊狄之輒

敢陵侮如此而二伯不攘斥之趙氏鵬飛曰晉文一勝楚兩朝天王至翟泉之會則已不親之矣盟王

臣且怠於行何有於狄文公剛毅果敢有過於齊桓惜其老而力有所不逮也家氏鉉翁曰晉文置狄

不問以狄無僭王圖大之心而楚之志不在小吳氏澂曰二十八年之冬會溫以圖許而許竟不服二十九年之夏盟翟泉謀伐鄭而鄭亦不畏至此年之夏狄殷於乘間而侵齊故晉文自城濮踐土而下伯業浸浸以衰至此亦可以自反矣

秋衛殺其大夫元咺

左傳

晉侯使醫衍酖衛侯甯俞貨醫使薄其酖不死公為之請納玉於王與晉侯皆十鼓王許之秋

乃釋衛侯衛侯使賂周欽治厘曰苟能納我吾使爾為卿周治殺元咺及子適子儀公入祀先君周治既

服將命周欽先入及門遇疾而死治厘辭卿

公羊

衛侯未至其稱國以殺何道殺也

穀梁

稱國以殺罪累上也。以是為訟君也。衛侯在外其以累上之辭言之何也。待其殺而後入也。

胡傳

元咺訟君為惡君歸則已出君出則已歸無人臣之禮信有罪矣。則稱國以殺而不去其官何

也。春秋之法躬自厚而薄責於人。君子之道譬諸射。失諸正鵠反求諸己。衛侯之躬無乃有闕盍亦省德而內自訟乎。夫稱國以殺者君與大夫專殺之也。衛侯在外其稱國以殺何也。穀梁子曰待其殺而後入也。待其殺而後入是志乎殺。咺瑕者也。兵莫憚於志。鎡鉞為下衛侯未入稱國以殺此春秋誅意之效也。然則大臣何與焉。從君於惡而不能止故并罪之也。

集說

范氏甯曰案宣九年陳殺其大夫泄治傳曰稱國以殺其大夫殺無罪也。此傳曰稱國以殺罪

累上也。凡稱國以殺大夫或殺無罪或罪累上參互不同略當近半。然則稱國以殺有二義。泄治忠賢而

君殺之是君無道也衛侯雖有不德臣無訟君之道
元咺之罪亦已重矣衛侯不思致訟之愆過而不改
而又怨忌上下皆失故曰罪累上 吳氏澂曰衛侯
未入國而殺元咺稱國殺者實衛侯使人殺之也夫
元咺以臣訟君君被執而咺偃然歸國假伯主之權
而易置其君如奕棋然其不臣之罪所當誅也今以
國殺人殺之誅之不以具罪也 季氏本曰當甯俞
陰使人殺之誅之不以具罪也 季氏本曰當甯俞
始盟既使居者無懼又可失信以殺
咺乎故不去大夫謂宜待以不死也

及公子瑕

穀梁

公子瑕累也
以尊及卑也

胡傳

公子瑕未聞有罪而殺之何也元咺立以為君
故衛侯忌而殺之也經以公子冠瑕而稱及見

瑕無罪事起元咺以咺之故延及於
瑕而衛侯忌克專殺濫刑之惡著矣

集說

杜氏預曰瑕立經年未會諸侯故不稱君
氏匡曰瑕元咺所假立而自秉國權瑕亦未如

君也故以君殺大夫之辭言之而在元咺下
覺曰瑕見立於元咺以咺及之者言瑕之見殺由於

咺咺存則瑕存咺死則瑕死也
侯衛侯使周欒治厘殺元咺及瑕而後入稱國以殺

咺瑕雖有罪而君亦有過也
何也為君非瑕志也是以先元咺而後瑕言事之在

咺也
也如文九年士穀及箕鄭父襄二十三年慶虎及慶

寅皆是也不書及者其罪同其殺之志均也
成八年趙同趙括十七年卻錡卻犇卻至是也

案公子瑕立已逾年不成之為君而止稱公子劉氏
敞遂疑左氏元咺立瑕之說為無有夫春秋事據左

氏不得於經而遂疑傳劉固過矣胡傳則疑咺雖立
瑕瑕自不取為君謂不與衛剽同者是瑕能拒咺辭
其位而不立也不與陳佗同者是瑕能守節不為國
人之所惡也此以瑕為賢褒而稱公子也王氏沿則
疑瑕與咺比謂叔武為君命奉之以受盟故稱衛子
若瑕者元咺君之非君而君者也今與咺同戮故稱
公子不與咺君之也此以瑕為惡貶而稱公子也斯
二者皆未達於春秋之例者也惟杜氏預以為未會
諸侯故不稱君庶幾得之而其說未脩春秋之法國
無二君則雖立未逾年未會諸侯亦得稱君國不可
無君也齊君荼是也國無二君而得列於會則雖其
人為篡弑之賊亦得稱君國不可無君又諸侯已君
之也曹伯負芻是也國有二君而皆當列於會則皆
得稱君以諸侯皆君之也衛所與剽是也國有二君
而其一未列於會則在位雖久亦不稱君以國既有
君諸侯又未嘗君之也鄭忽與儀是也公子瑕與子

儀正同國既有君已又未列於會故子儀不紀弑而瑕不稱君也然則瑕賢耶惡耶襄之耶貶之耶曰咺實立之而累及之瑕既無曹臧之節亦未有宋馮之謀則書曰及公子瑕而已矣

衛侯鄭歸于衛

公羊 此殺其大夫其言歸何歸惡乎元咺也曷為歸惡乎元咺元咺之事君也君出則已入君入則已出以為不臣也

胡傳

衛侯出奔於楚則不名見執於晉則不名今既歸國復有其土地矣何以反名之乎衛侯始歸

而殺叔武再歸而及公子瑕春秋之所惡也故再書其名為後世戒

集說

劉氏敞曰衛侯鄭歸于衛鄭之初歸也得言復當是之時叔武在內鄭雖無國國固其國也及

其又歸也殺叔武矣執之歸于京師矣殺元咺及公子瑕矣鄭雖得國國非其國也故不言復春秋之褒善罰惡豈不至明至察哉葉氏夢得曰晉侯執曹伯歸于京師及其復也書曰曹伯歸自京師晉人執衛侯歸之于京師及其復也書曰衛侯鄭歸于衛而不曰歸自京師何哉曹伯伯討也諸侯將見子臧於王而立之子臧辭而奔於宋晉侯使曹人及子臧而歸其君天子許焉故子臧反而曹伯歸天子命之使君也衛侯非伯討也魯公為納王於王與晉侯而後復焉雖曰命之非天子所以君諸侯之道也衛侯歸于衛而已陳氏傅良曰向也言復歸今歸不言復何奔失國之辭也執未失國之辭也凡執不言歸執而言歸危不得歸也是故執君不名歸然後名之執書衛侯歸書衛侯鄭執書曹伯伯歸書曹伯襄名之者亦失國之辭也趙氏鵬飛曰春秋書執諸侯歸京師者二晉文執衛成與成十五年晉厲執曹成是也

曹成之歸無罪也故不名衛成之歸有惡也故名曹成之歸天王釋之故書歸自京師衛成之歸晉釋之故書歸于衛衛成何罪耶自楚歸則殺叔武自京師歸則殺公子瑕兄弟天倫也收而殺之此其所以為惡而不免於聖人之誅也家氏鉉翁曰衛侯即楚見伐於晉及聞楚敗棄廟祔而逃於楚其罪當討幸而得歸乃逞忿以殺其弟是之謂怙終國已非其國矣魯人為之納賂以請又幸而得釋不當復而復者也其以名而歸之不與之以復此春秋一字之權吳氏澂曰已殺元咺則無人拒之有周治等納之而勢易故書歸李氏庶曰諸侯執不書歸僖十九年滕子成九年鄭伯襄十六年莒子邾子十九年邾子之類是也惟晉文之執曹衛書歸陳氏曰危不得歸也又晉厲之執曹伯書歸胡氏曰言天王之釋有罪也又曰衛侯歸之于京師而書歸于衛讖不在王室也曹伯亦歸于京師而書歸自京師讖不在晉也

汪氏克寬曰衛成貨醫納王而獲免與曹共之貨筮史而得歸國實無以異故其歸皆書名然衛侯之忌刻戕殺二弟其罪又浮於曹伯故其歸不稱復也

晉人秦人圍鄭

左傳

九月甲午晉侯秦伯圍鄭以其無禮於晉且貳於楚也晉軍函陵秦軍汜南佚之狐言於鄭伯

曰國危矣若使燭之武見秦君師必退公從之辭曰臣之壯也猶不如人今老矣無能為也已公曰吾不能早用子今急而求子是寡人之過也然鄭亡子亦不利焉許之夜縋而出見秦伯曰秦晉圍鄭鄭既知亡矣若亡鄭而有益於君敢以煩執事越國以鄙遠君知其難也焉用亡鄭以倍鄰鄰之厚君之薄也若舍鄭以為東道主行李之往來共其乏困君亦無所害且君嘗為晉君賜矣許君焦瑕朝濟而夕設版

馬君之所知也夫晉何厭之有既東封鄭又欲肆其西封若不闕秦將焉取之闕秦以利晉唯君圖之秦伯說與鄭人盟使杞子逢孫楊孫戍之乃還子犯請擊之公曰不可微夫人之力不及此因人之力而敝之不仁夫其所與不知以亂易整不武吾其還也亦去之初鄭公子蘭出奔晉從於晉侯伐鄭請無與圖鄭許之使待命於東鄭石甲父侯宣多逆以為大子以求成於晉晉人許之

函陵寰宇記函陵在新鄭縣北十三里山形如函故名函陵今屬河南開封府汜南杜注此東汜也在滎陽中牟縣南今屬河南開封府焦瑕杜注晉河外五城之二邑地理志陝縣有故焦城今在陝州南二里文十三年使詹嘉處瑕以守桃林之塞蓋與桃林相近之地

集說

孫氏復曰翟泉之盟鄭不至故家氏鉉翁曰左傳謂秦晉圍鄭以其無禮於晉且貳於楚也

鄭之貳楚固有之矣晉文始入猶曰舊怨未忘今幾年矣鄭預會盟不應猶以舊怨加兵蓋翟泉之會不至是以疑其貳於楚耳去年會溫朝王今一不預盟即加之兵春秋是以貶秦伯苟知義之不可則當相率俱去不當私及鄭盟舍之徑歸故俱貶而人之李氏廉曰秦晉之爭始此夫秦以非子之餘踐岐豐之地春秋所書大抵皆與晉兵爭之迹耳自穆公釋韓之憾而從晉於城濮之功於是盟于溫于翟泉借役於齊鄭戮力同心未始有隙由燭之武一語而秦輔晉之心變矣文公既卒而般戰起釁厥後彭衙之戰令狐之戰河曲之戰秦之伐晉者六晉之伐秦亦六興數十年報復之師更四君而未已蓋至襄公十一年戰櫟十三年十三國之伐然後文伐之文始絕於經然則有穆公之賢而其所就僅止此豈非貪利忘義之失哉汪氏克寬曰翟泉之盟實謀討鄭而鄭不請服故是春晉人侵鄭侵之而猶不服故晉文

復偕秦以圍之蓋以鄭貳心於楚而數加兵非專為釋私忿而已也然諸侯不見德而惟虐是聞豈伯者服貳之道哉況二國同役而不同心春秋貶而人之蓋有在矣

案圍鄭之役孫氏復胡氏瑗俱據經文以為責鄭不與翟泉之盟左氏傳亦謂無禮於晉且貳於楚貳楚即謂其不與盟也鄭在王畿於翟泉為近伯主盟於近地而不至是亦無禮不必專指出亡時事也況王享晉侯鄭伯為傳又屢同盟會豈晉至此時猶修舊怨哉故不錄胡傳而獨取家氏鉉翁汪氏克寬之說

介人侵蕭

集說徐氏彥曰來朝稱名今稱人者退之也張氏洽曰介再來魯而次年遂侵蕭求援而後舉兵也與荆人秦術之聘同李氏廉曰介侵蕭三傳皆無事迹胡氏亦略之惟張氏說是

冬天王使宰周公來聘

左傳

冬王使周公閱來聘饗有昌歜白黑形鹽辭曰國君文足昭也武可畏也則有備物之饗以象

其德薦五味羞嘉穀鹽虎形以獻其功吾何以堪之

穀梁

天子之宰通於四海

集說

杜氏預曰宰周公天子三公兼冢宰而使來聘魯用見周室洽

夷大臣失職也程氏端學曰禮雖有天子聘諸侯之文然魯未嘗朝王不過因會盟晉侯朝於王所而已襄王不能正王法而下聘焉已失道矣况遣冢宰乎陵遲甚矣

公子遂如京師

此聘周之始

遂如晉

此聘晉之始

左傳

東門襄仲將聘於周遂初聘於晉

穀梁

以尊遂乎早此言不敢叛京師也

胡傳

大夫出疆有以二事出者有以一事出而專繼事者其書皆曰遂公子遂如周及晉與祭公自

魯逆王后皆所謂以二事出者也公子結往媵而及齊宋盟則專繼事者也是非得失則存乎其事矣冢宰上無三公其職仕為至重而來聘於魯天王之禮意莫厚焉魯侯既不朝京師而使公子遂往又以二事出夷周室於列國此大不恭之罪履霜堅冰之漸春秋之所誅而不以聽者也則何以無貶乎有不待貶絕而罪惡見者不貶絕以見罪惡

集說

杜氏預曰如京師報宰周公既命聘周又命自周聘晉故曰遂趙氏匡曰公羊曰大夫無遂

事此亦受命於君而何得指大夫也又云公不得為政爾非也僖公之時大夫初未強豈敢專行哉此殆

誣之矣

孫氏復曰非禮也天子至尊非諸侯可得

伉僖與襄王交聘伉孰甚焉故曰天王使宰周公來

聘公子遂如京師遂如晉以惡之

蘇氏轍曰內曰

如外曰使皆君命也所謂以二事出者也

葉氏夢

得曰如曷以言遂疾不專於王也遂如京師拜周公

之聘也曰因是而往聘晉焉非尊天子之道也大夫

出疆固有以二事行者矣必再見名公子遂會晉趙

盾盟于衡雍公子遂會維戎盟于暴是也惟天子不

可以二事故諱為之辭不再挈公子遂若大夫之專

事然陳氏傅良曰自桓王以下王室無聘魯者於

是再聘而宰周公實來則已尊矣公子遂如京師遂

如晉以其如京師不敢不如晉是夷周於晉也吾大

夫如京師不書於是始書之聘周非常事矣黃氏仲炎曰凡書大夫如京師者見諸侯不朝而聘也

趙氏鵬飛曰自春秋至是天王遣王臣聘魯者凡六然未有以三公下聘者今襄王以晉文兩合諸侯而朝之於是以三公來聘周公之來非特聘魯也晉齊以降皆歷聘耳魯以公子遂報宰周公之聘而遂如晉則是以事鄰國之禮事周也家氏鉉翁曰前日公及諸侯僅朝王於河陽今天子之宰下臨王之寵魯至矣公當朝於京拜王命之辱乃俾遂報聘抑又二事如晉是之謂大不恭春秋豈容盡為魯諱書公子遂如京師遂如晉貶也又曰宰嚭宰糾皆名今周公其無責乎曰周公下聘猶曰厚往薄來以懷諸侯魯乃以一公子報謝且二事如晉罪在魯非周之責李氏廉曰此條與公如京師遂會伐秦皆是王事書遂此本以二事出春秋則以如晉為遂事不敢以王事同於伯事也彼本以伐秦出春秋則以伐秦為

遂事不欲先伯事而後王事也 汪氏克寬曰經書
天王來聘者七惟此使冢宰兼三公下聘蓋非常之
禮莫大之寵自春秋以來未之有也或者以僖有兩
朝王所之勤而報之歟經書卿大夫如周聘者四而
惟此以二事出自入春秋未嘗朝聘於京師以魯之
望國僖之賢君而對揚天子之休命者如是其簡慢
況晉未聘魯而魯往聘周先聘魯而魯荀荅聘是尊
王之禮不如事伯之謹也雖然猶勝於隱桓之受聘
而不報者也王朝冢宰四見於經咺糾以瀆三綱而
書名閔之來聘禮雖過厚視賄寵妾命篡弑者則其
罪薄乎云爾 趙氏汭曰周制諸侯於天子有見有
貢而無聘問見則大行人朝覲以下六禮貢則六服
所貢之物小行人令諸侯春入貢是也諸侯於天子
言聘乃東遷禮失之辭由職貢俱廢而後以聘禮上
問如邦交非成周之舊也 王氏樵曰晉未聘魯魯
初往聘故左傳曰遂初聘於晉周先聘魯魯本欲往

報故左傳曰將聘於周以將字起下遂字因來而報不專於王室而以二事遣使直書而義自見矣

壬襄王二十三年

三十有一年

晉文七年齊昭四年衛成六年蔡莊十七年鄭文四十四年曹

共二十四年陳共三年杞桓八年宋成八年秦穆三十一年楚成四十三年

春取濟西田

禮反

左傳

春取濟西田分曹地也

公羊

惡乎取之取之曹也曷為不言取之曹諱取同姓之田也此未有伐曹者則其言取之曹何晉

侯執曹伯班其所取侵地於諸侯也晉侯執曹伯班其所取侵地於諸侯則何諱乎取同姓之田久也

胡傳

公羊曰取之曹也晉侯執曹伯班其所侵地於諸侯不繫國者吾故田也復吾故田而謂之取

何也春秋之法
不以亂易亂

集說

趙氏匡曰凡力得之曰取雖取本邑亦無異辭不當取也又曰凡內取之邑不繫國者皆本是

魯邑魯為外國所奪今却取之既是本邑不可繫之他國耳劉氏敞曰孰取之吾故也取邑必繫國取

邑不繫國非也取附庸也取田必繫國取田不繫國吾故也非外取之也又曰左氏曰使滅文仲往非也

若實滅文仲往不應不書注謂文仲但請田非聘饗會同故不書亦非也告糴乞師弔葬致女皆書請田

非常自應書又叔孫豹鄩世子巫如晉亦書即請田之比也禮曰卿非君命不越境越境則書之何為請

田獨不書哉又曰分曹地自洮以南東傳於濟若然當謂之取曹田自濟水不得云取濟西田而已孫

氏覺曰左氏以為晉侯分曹地以與諸侯而魯取濟西之田然經書與汶陽田無異蓋魯濟西之田當見

侵入於曹晉侯執曹伯而反諸侯之侵地魯於是乎
取之 高氏閔曰凡取人之有其惡易見而取已之
有不以道者其罪難知聖人亦正名曰取所以顯微
也 張氏洽曰復魯之舊地亦與非其有而取之者
同蓋無王命以正疆理皆取之不以其道也況晉奪
之曹以與魯本以其私憾而非有至公之義乎 趙
氏鵬飛曰淮濟岱皆魯之境則濟西蓋魯田也莊三
十年公及齊侯遇于魯濟濟水出齊魯之間故有齊
濟有魯濟今曰濟西則自濟以西之田耳內取田無
不繫之國者惟成二年取汶陽田與此取濟西田不
繫之國不繫之國則本魯田矣宣元年齊人取濟西
田取是田也至宣十年則書齊人歸我濟西田書歸
我則知濟西本魯田也審矣 呂氏大圭曰取濟西
田不繫曹則濟西田魯故田也取汶陽田不繫齊則
汶陽田亦魯故田也汶濟皆近魯之竟也然汶陽濟
西則言取鄆謹龜陰謹闡則言歸言取者非彼所欲

也非彼所欲我取之曰取言歸其所欲也非我強之而彼自歸曰歸 家氏鉉翁曰此春秋責備晉文之意也土地皆王之所有諸侯擅相侵奪無王也盟主治其侵奪之罪固職分之宜為更能稟命於王還以錫魯夫然後盡尊君之義春秋以是責晉文責其所可責也 李氏庶曰濟西田左氏穀梁皆以為曹田公羊以為曹所侵魯之故田胡氏從公羊濟西田首末三見於經此年取之曹宣元年以賂齊宣十年齊人以歸我又曰經書田十桓元年假許田宣元年齊取濟西田十年齊歸濟西田成二年取汶陽田八年韓穿來言汶陽田襄十九年取邾田定十年齊歸邾謹龜陰田哀二年取鄆東田沂西田及此年也不繫國者吾故田也非吾田則繫國邾田是也邾東沂西田不繫國者乘上文伐邾文也 汪氏克寬曰春秋書內取者十有七以兵力取他國之地則書戰伐若敗宋師取郕取防伐齊取穀伐莒取向伐邾取訾婁

取繹取鄆東田及沂西田是也藉大國之威不以兵力而復故地則不書侵伐而止書取濟西汶陽之田是也非故地則繫之國取邾田自漵水是也取附庸之小國而滅之則諱不言侵伐而亦止書取取根牟取邾取邾取鄆是也取之而存其祀則伐邾取須句是也若取邾則乘亂取邑故不詳錄取開則昭公在外而取內邑又春秋之變例也或謂濟西乃晉人侵魯之故疆是時晉霸方強豈肯歸地於魯况魯晉非接壤之國何謬之甚哉

公子遂如晉

左傳

襄仲如晉拜曹田也

集說

高氏閌曰晉未嘗來聘而公子遂去冬既聘今春又往謝取濟西之田何厚於晉而薄於周也

趙氏鵬飛曰前日公子遂以如周之故遂如晉則事晉為不專而繼得侵疆焉於是復以遂如晉謝不敏也然宰周公之聘在遂未如周之前而濟田之歸在既如晉之後則周之恩為厚於晉不再如周而再如晉僖公於輕重厚薄之間抑亦左矣鄭氏王曰魯遣使如晉拜分田之賜而不請命於周正疆理之復但知有霸不知有王但知利不知義此春秋所以於濟田書取也

夏四月四卜郊

公羊 曷為或言三卜或言四卜三卜禮也四卜非禮也三卜何以禮四卜何以非禮求吉之道三禘嘗不卜郊何以卜卜郊非禮也卜郊何以非禮魯郊非禮也魯郊何以非禮天子祭天諸侯祭上天子有方望之事無所不通諸侯山川有不在其封內者則不祭也

穀梁

夏四月不時也
四卜非禮也

胡傳

記禮者曰祭帝於郊所以定天位也禮行於郊而百神受職焉魯諸侯何以有郊成王以周公

有大勲勞於天下命魯公世祀周公以天子之禮樂是故魯君孟春乘大輅載弧韞旂十有二旒日月之章祀帝於郊配以后稷天子之禮也以人臣而用天子之禮可乎是成王過賜而魯公伯禽受之非也揚子曰天子之制諸侯庸節節莫差於僭僭莫重於祭祭莫重於地地莫重於天諸侯而祀天其僭極矣聖人於春秋欲削而不存則無以志其失為後世戒悉書之乎則歲事之常有不勝書者是故因禮之變而書於策或以卜或以時或以望或以牲或以牛於變之中又有變焉者悉書其事而謂言偃曰魯之郊禘非禮也周公其衰矣祀之郊也禹也宋之郊也契也是天子之事守也言杞宋夏商之後受命於周作

賓王家統承先王修其禮物其得行郊祀而配以其祖非列國諸侯之比也是故天子祭天地諸侯祭社稷祝嘏莫敢易其常古易則亂名犯分人道之大經拂矣故曰郊社之禮所以事上帝也宗廟之禮所以祀乎其先也明乎郊社之禮禘嘗之義治國其如指諸掌乎夫庶人之不得祭五祀大夫之不得祭社稷諸侯之不得祭天地非欲故為等衰蓋不易之定理也知其理之不可易則安於分守無欲僭之心矣為天下國家乎何有

集說董氏仲舒曰魯蜀為郊周公故也不於日之至避王室也此旬而卜之遠怠慢也必更三旬禮盡於三也何氏休曰郊所以祭天不言郊天者謹不敢斥尊孔氏穎達曰周禮太宰職云祀五帝前期十日帥執事而卜日然則將祭必十日之前豫卜之也言四卜郊者蓋三月每旬一卜至四月上旬更

一卜乃成為四卜也。啖氏助曰：天子以冬至祭上帝，又以夏之孟春祈穀於上帝於郊，故謂之郊。魯以周公之故，特以孟春祈穀於上帝，亦謂之郊。郊皆用辛日，故以二月卜，三月上辛不吉，則卜中辛，又不吉，則卜下辛。所謂吉事先日也。卜三旬皆不吉，則不郊。程子曰：周公之功固大矣，皆臣子之分所當為。魯安得獨用天子禮樂哉？成王之賜伯禽之受，皆非也。朱子曰：如四卜五卜，牛傷牛死，是失禮之中，又失禮也。陳氏傳良曰：以其不勝譏議，其甚者爾。趙氏鵬飛曰：春秋卜郊者四，無一從者，天豈容僭哉？然四卜五卜而遂不郊，猶為知自反，以畏天而僖之。不從則猶三望，是犯天威而必於僭也，其可乎？吳氏澂曰：經書郊者九，龜違者四，牛災者四，非時大不敬者一。蓋魯郊雖僭行之已久，視為常事故不悉書。惟卜之不從，牛之有變，及時之大異於常而後書，因以見其僭禮也。三卜不從而不郊，止也。三不吉而至

四卜四不吉而至五卜瀆甚矣牛災荐作亦可以見魯郊之僭鬼神弗與也四月五月固為不時猶夏時之春也九月夏之孟秋不卜日不卜牲而強用其禮焉特書用非時不敬之大也李氏廉曰郊之用卜何也古者大事皆決於卜公羊以為天子之郊常事則不卜魯郊非常是以卜之卜止於三吉則為凶則已左氏以為常禮不卜止卜牲與日案周祀五帝前期太宰帥執事而卜日則天子亦卜也但所卜者不過卜日與牲而已春秋所書亦卜日與牲也汪氏克寬曰左傳家語皆云魯以啟蟄而郊朱子謂夏正之孟春漢太初以前以啓蟄為正月中氣也然啖氏謂以周之二月卜三月且辨穀梁以周之十二月卜正月非是今考宣三年成七年定十五年哀元年之改卜牛皆在正月蓋成王所賜止是祈穀之郊乃夏之孟春啖氏所言卜起二月下旬而盡於三旬者禮之正也穀梁所言卜起十二月者禮之未失也故子

服惠伯云魯將以十月上辛有事於上帝孟獻子曰正月日至可以有事於上帝而明堂位注疏以孟春為周之正月郊特牲疏崔氏皇氏用王肅之說又以魯冬至郊天建寅之月又郊以祈穀皆因魯郊之非時而誤也聖證論引穀梁言魯止一郊或用子月或用寅月蓋魯郊非時或僭天子日至之期而失之太早或踰啟蟄之節則失之後時也或謂卜自建子之月而始又謂郊非祈農事則與程子冬祀圜丘春祈穀之說異矣

不從乃免牲

公羊

曷為或言免牲或言免牛免牲禮也免牛非禮也免牛何以非禮傷者曰牛

穀梁

免牲者為之緇衣熏裳有司元端奉送至於南郊免牛亦然乃者亡乎人之辭也

胡傳

古者大事決於卜故洪範稽疑獨以龜為主卜而不從則不郊矣故免牲

集說

杜氏預曰免猶縱也啖氏助曰凡牲必養二牲一以祀上帝一以祀后稷凡卜三旬皆不吉

則不郊牛死及牛有災害則卜稷牛而代之若卜稷牛不吉及稷牛又死亦皆不郊凡不郊皆卜免牲卜免牲吉則免之不吉則但不郊而已劉氏敞曰所謂不從者謂日不吉也不吉則不敢郊故須免牲也

趙氏鵬飛

曰牲一也或曰免牲或曰免牛何也未牲曰牛既卜曰牲牲具而卜郊不從則免牲免牲則

不郊矣

王氏元杰曰禮以十月上甲繫牲是日至

之郊用子建亥之月當繫牲矣祈穀之郊用寅建丑

之月當繫牲矣經於四月書牲牲已成矣但以卜郊不從而免之故不曰牛而曰免牲李氏廉曰書免

牲則見其不郊矣僖三十一年襄七年止書免牲是也若不郊而不行免牲之禮則不書免牲成十年襄

十一年止書不郊是也若牛死則無可免矣宣二年牛死乃不郊是也獨成七年既書免牛又書不郊何也穀梁曰免牲不曰不郊免牛亦然此經復書不郊者蓋以僖公免牲與三望同時故略去不郊之文今此春免牛而夏三望故須書不郊以見之也免牲者為之緇衣纁裳奉之南郊天位歸之於陽也已傷曰牛而尚卜免之何也嘗置之上帝矣卜而後免之不敗專也汪氏克寬曰免牲不言不郊蓋卜免牲而吉則不可郊矣免牛則猶可再卜牛故復言不郊

猶三望

左傳四卜郊不從乃免牲非禮也猶三望亦非禮也禮不卜常祀而卜其牲日牛卜日曰牲牲成而

卜郊上怠慢也望郊之細也不郊亦無望可也

公羊

三望者何望祭也然則曷祭祭泰山河海曷為祭泰山河海山川有能潤於百里者天子秩而

祭之觸石而出膚寸而合不崇朝而徧雨乎天下者唯泰山爾河海潤於千里猶者何通可以已也何以

書識不郊而望祭也

穀梁

猶者可以已之辭也

胡傳

望祭也有虞氏受終而望因於類巡狩而望因於柴皆天子之事也今魯不郊而望故特書曰

猶猶者可以已之辭其言三望何也天子有方望無所不通諸侯非名山大川在其封內者則不祭魯得用重禮視王室則殺故望止於三比諸侯則隆故河海雖不在其封而亦祭然非諸侯之所得為也

集說

杜氏預曰望而祭之也啖氏助曰郊後必望祭若不郊則不當望書猶非禮也孫氏復曰

公羊謂泰山河海鄭氏謂海岱淮杜預稱分野之星及境內山川據鄭杜止以諸侯祭其封內云爾況河海淮非魯封內又諸侯無祭分野星辰之事且魯既僭天子蓋於四望之中祭其大者三爾公羊得之朱子曰猶三望是不必望而猶望也猶繹是不必繹而猶繹也張氏洽曰鄭杜恐臆說蓋天子四望王雖令魯郊止行祈穀之郊令魯得望特比天子闕其一故三望與郊書之無異而書曰猶言不當望而望祭也如使魯望不出境何為言猶以譏之若壬午猶繹之書乎公羊之說必有所傳李氏廉曰春秋書猶三猶三望猶朝於廟猶繹也三望與繹譏其可已而不已之辭也朝廟幸其不可已而不已之辭也汪氏克寬曰周官四望蓋望四方今魯三望蓋泰山在魯西海在魯東河在魯北也

案三望之說諸家不同胡傳獨取公羊以為泰山河海蓋以虞帝受終巡狩望秩山川則望者祭山川之

名而境內山川乃諸侯所當祭者常事可不書也孫氏復張氏洽汪氏克寬皆主公羊於理為近但周禮大司樂分樂而祀之奏黃鐘歌大呂舞雲門以祀天神奏太簇歌應鐘舞咸池以祭地祇奏姑洗歌南呂舞大磬以祀四望奏蕤賓歌函鍾舞大夏以祭山川既曰四望又曰山川是山川之外別有四望矣天神曰祀四望亦曰祀地祇曰祭山川亦曰祭是四望附於天神山川附於地祇不得以山川列於四望矣祭祀各從其類故近世郊祀之禮必以星辰風雨從祀於圜丘嶽鎮海瀆從祭於方澤也鄭注賈疏謂日月星辰在天神之列又謂司中司命風師雨師當在四望意者四望為天神之屬而日月星辰司中司命風雨皆在祀中乎姑附存之以俟考

秋七月

附錄左傳

秋晉蒐於清原作五軍以禦狄趙衰為卿

清原杜注河東聞喜縣北有清原今在山西平陽府稷山縣西北二十里

冬杞伯姬來求婦

公羊

其稱婦何有姑之辭也

穀梁

婦人既嫁不踰竟杞伯姬來求婦非正也

胡傳

蕩伯姬來逆婦而書者以公自為之主失其班列書也杞伯姬敵矣其來求婦曷為亦書見婦

人之不可預國事也王后之詔命不施於天下夫人之教令不施於境中昏姻大事也杞獨無君乎而夫人主之也故特書於策以為婦人亂政之戒母為子求婦猶曰不可況於他乎此義行無呂武之禍矣

集說

陸氏淳曰經文直書之以志其非禮耳公羊云兄弟之辭有何義乎劉氏敞曰其言婦緣姑

言之辭也婦人不專行杞伯姬來求婦非禮也姑無自求婦者也葉氏夢得曰逆婦非姑道求婦非

母道季氏本曰杞弱為魯所陵故伯姬二十八年來魯今又來求婦求庇於魯耳

狄圍衛

集說

吳氏澂曰狄去年侵齊今又圍衛若無晉霸然豈以晉文居狄之久而狎之歟

十有二月衛遷于帝丘

于穀作於陽縣故帝顓頊之虛故曰帝丘

今直隸大名府開州有顓頊城是也

左傳

卜曰三百年衛成公夢康叔曰相奪子孫公命祀相甯武子不可曰鬼神非其族類不歆其祀

祀鄫何事相之不享於此久矣非衛之罪也不可以問成王周公之命祀請改祀命

胡傳

帝丘東郡濮陽顓頊之虛亦衛地也狄嘗迫逐黎侯黎侯寓於衛而衛不能修方伯連率之職

戎嘗伐凡伯于楚丘而衛不能救王臣之患其後遂為狄人所滅東徙渡河矣齊桓公封之而衛國志亡今又為狄所圍其遷于帝丘避狄難也而衛侯不能自強於政治晉文無安列國之功莫不見矣

集說

張氏洽曰狄以閏二年入衛齊桓救而封之自此狄不敢加兵於衛桓公之力也齊桓即世衛

文忘齊之大德從宋襄伐齊殺家嗣而立不正於是狄人乃假義伐衛衛人忘恩而啓狄之寇蓋始於此自晉文興不復侵伐相攻矣今復迫衛致其遷都此胡傳所以罪晉文也黃氏仲炎曰傳曰諸侯有道守在四鄰夫何遷之有不知出此而惟偏是畏惟地利是擇偏者無已則遷者亦將無已是徒勸民而已

非善為謀也 趙氏鵬飛曰齊侯城楚丘以遷衛至是蓋三十年矣衛雖遷而狄未艾齊桓未沒蓋已侵衛僖十三年之役是也十八年及邢人伐衛二十一年侵衛狄為患於衛抑亦甚矣今又整兵而圍之衛不得已遷于帝丘而避焉然而衛有狄患齊桓城而遷之今狄日熾而衛自遷晉文坐視而不恤文德衰矣抑亦耄而謀不及是乎 家氏鉉翁曰齊桓晚年不能救黃猶曰黃遠而力不逮也衛近於晉非其力之不及而休戚不相關尚何以為盟主哉

附錄左傳

鄭洩駕惡公子瑕鄭伯亦惡之故公子瑕出奔楚

癸襄王二十
已十四年

三十有二年

晉文八年齊昭五年衛成七年
蔡莊十八年鄭文四十五年曹

共二十五年陳共四年杞桓九年宋成
九年秦穆三十二年楚成四十四年

春王正月

附錄左傳

春楚闕章請平於晉晉陽處父報之晉楚始通

集說

王氏樵曰楚非衰弱不振畏我而請平也我與之平非能使之受齊盟而遵約禁也攘討之義

急故和同之說入焉晉文之志荒矣

夏四月己丑鄭伯捷卒

捷公作接

集說

杜氏預曰文公也

衛人侵狄秋衛人及狄盟

左傳

夏狄有亂衛人侵狄狄請平焉秋衛人及狄盟

胡傳

其不地者盟於狄也再書衛人而稱及者所以罪衛也盟會衰世之事已非春秋之所貴況即

其廬帳刑牲歃血以要之哉

集說

杜氏預曰報前年狄圍衛不地者就狄廬帳盟孔氏穎達曰上云衛人侵狄及狄盟猶若公

如晉及晉侯盟是指其所居之處故不言地家氏鉉翁曰衛三十年間國凡再遷抑亦微弱矣一旦狄有內亂從而侵之狄請平自是北鄙不聳可謂能自彊矣書衛人言侵之盟之皆制於衛也吳氏澂曰衛畏狄之彊遷都以避之今乘其亂始敢以兵攻其境言侵不言伐不敢聲其罪而討之也汪氏克寬曰書及則是盟乃衛人所欲

冬十有二月己卯晉侯重耳卒

左傳

冬晉文公卒庚辰將殯於曲沃出絳柩有聲如牛卜偃使大夫拜曰君命大事將有西師過軼

我擊之必大捷焉杞子自鄭使告於秦曰鄭人使我掌其北門之管若潛師以來國可得也穆公訪諸蹇叔蹇叔曰勞師以襲遠非所聞也師勞力竭遠主備之無乃不可乎師知所為鄭必知之勤而無所必有悖心且行千里其誰不知公辭焉召孟明西乞白乙使出師於東門之外蹇叔哭之曰孟子吾見師之出而不見其入也公使謂之曰爾何知中壽爾墓之木拱矣蹇叔之子與師哭而送之曰晉人禦師必於殽殽有二陵焉其南陵夏后皋之墓也其北陵文王之所辟風雨也必死是間余收爾骨焉秦師遂東

胡傳

案左氏載秦伯納晉文公及殺懷公於高梁其事甚詳而春秋不書者以為不告也徐邈曰諸

侯有朝聘之禮赴告之命所以敦交好通憂虞若鄰國相望而情志否隔存亡禍福不以相關則他國之

史無由得書魯政雖陵典刑猶在史冊所錄不失常法其文足證仲尼修之事仍本史有可損而不能益也

集說

啖氏助曰他國之事不憑告命何由得書但書所告之事定其善惡以文褒貶爾列國至多若

盟會征伐喪紀不告亦書則不勝書矣家氏鉉翁曰齊桓優游不迫有周家盛時氣象晉文淺狹迫急漸有戰國秦漢之風城濮之役左傳所謂三罪而民服皆失刑也顛頤和瞞舟之僞皆在議勲議能之科有罪猶宥而况罪不至死乎晉文執心不弘狐趙諸人濟以深刻每每如此王氏元杰曰齊孝不能繼桓之業晉襄能紹文之伯傳之累世其故何耶夫國家之盛衰繫乎人才之進退桓公之於管仲權歸一己身沒而事業竟衰文公入國之始則能選用狐趙之徒以成伯業傳之子孫奕世而不已則是用人之

道有國家之先務可不鑒乎 李氏廣曰晉文以二
十四年入國至二十八年城濮始主伯迄三十二年
凡五年李氏曰晉有二文之業盖文侯文公也書錄
文侯之命悍王於艱錫以桓宅為東周賢侯春秋詳
文公之伯盖文侯家法也文公之興其事易於齊桓
固有自來矣然文公既入國而事之不載於經者凡
四年雖以納王之懿功削而不見至二十八年一簡
之中乃五挈晉侯不以為繁何哉盖自武公以支代
宗并吞專立讀無衣之詩雖晉之臣民不能自安也
春秋為是黜晉不書文公奔而復國內何所承上何
所稟經復畧之勤王固為大美然特以求諸侯之利
心而為之豈真知有君臣之義哉至二十八年晉楚
之事乃關中外之盛衰非繫一國之得失春秋抑楚
之深故與晉之亞則晉亦不為無績於列國矣此其
與桓公並稱歟大抵桓文雖並稱而文固非桓匹也
桓公二十餘年蓄威養晦始能問罪於楚文公一駕

而城濮之功多於召陵桓公屢盟屢會遲迴晚歲始會宰周公文公再合而溫之事敏乎葵丘桓公會鄆失魯盟幽失衛首止失鄭葵丘失陳文公三會而大侯小伯莫有不至其得諸侯又盛乎桓公而曰文非桓匹何也文公之功多於桓公者罪亦多於桓公也事速就乎桓公者義尤壞乎桓公者也名盛乎桓公者實哀乎桓公者也春秋不以功蓋罪不以事掩義不以名誣實此其非桓匹歟桓公得江黃而不用於伐楚文公謂非致秦則不可與楚爭楚抑而秦興矣此桓公之所不肯為也桓公會則不通三川盟則不加王人文公會畿內則伉矣盟于虎則恃矣此桓公之不敢為也桓公寧不得鄭不納子華懼其獎臣抑君不可以訓文公為元咺執君則三綱五常於是廢矣此又桓公不忍為也夫子正譎之辨獨不深切著明哉

甲襄王二十有三年

晉襄公驩元年齊昭六年衛成
八年蔡莊十九年鄭穆公蘭元

年曾共二十六年陳共五年杞桓十年宋
成十年秦穆三十三年楚成四十五年

春王二月秦人入滑

左傳

三十三年秦師過周北門左右免胄而下超
乘者三百乘王孫滿尚幼觀之言於王曰秦師

輕而無禮必敗輕則寡謀無禮則脫入險而脫又
能謀能無敗乎及滑鄭商人弦高將市於周遇之以
乘韋先牛十二犒師曰寡君聞吾子將步師出於敝
邑敢犒從者不腆敝邑為從者之淹居則具一日之
積行則備一夕之衛且使遽告於鄭鄭穆公使視客
館則束載厲兵秣馬矣使皇武子辭焉曰吾子淹久
於敝邑唯是脯資餼牽竭矣為吾子之將行也鄭之
有原圃猶秦之有具囿也吾子取其麋鹿以間敝邑

若何杞子奔齊逢孫楊孫奔宋孟明日鄭有備矣不可冀也攻之不克圍之不繼吾其還也滅滑而還

穀梁

滑國也

集說

胡氏寧曰秦人滅滑而書入者不能有其地非未滅之也而肆其悖心無故滅人之罪著矣

張氏洽曰孟明視西乞術白乙丙不書罪之也汪

氏克寬曰滑國伯爵莊十六年同盟於幽僖二十年

鄭公子士洩堵寇帥師嘗入滑矣蓋國近於鄭故秦

雖滅之而不有其地也季氏本曰秦自三十年秋

從晉圍鄭已識地形自周而東將以襲鄭乘便入滑

得利而還歸途非有晉規則秦之稱兵不止晉鄙而

長驅以及東諸侯之國矣故穀之敗亦秦兵不敢東

下之一機也黃氏正憲曰秦雖繫顓頊之後然棄

禮義上晉功未免西戎習氣自晉文藉其力以勝楚

始通盟會抑楚以興秦有拒虎追狼之意當其與晉

圍鄭背晉而去已有爭雄之心使秦得志於鄭乘勝長驅諸侯必有再受其毒者幸而謀洩於滑師敗於穀秦兵不敢東下然秦晉讎殺者四五世於是晉力稍衰而楚得以復橫矣

齊侯使國歸父來聘

左傳 齊國莊子來聘自郊勞至於贈賄禮成而加之以敏臧文仲言於公曰國子為政齊猶有禮君其朝焉臣聞之服於有禮社稷之衛也

集說

吳氏澂曰二十六年有伐齊取穀之怨二十八年晉文既伯公子遂聘齊以解讎而講好越六

年而歸父來報公子遂之聘也季氏本曰古者諸侯邦交其禮甚簡入春秋時比周相結使命日煩至於齊桓漸復反正晉文代興續修霸業道途聘使無復翩翩此可見霸令行於諸侯而節簡目疎猶存古

意也至國歸父來聘而大夫之交政列國者紛紛無制矣

夏四月辛巳晉人及姜戎敗秦于殽

敗必邁反敗秦下左殽有師字

杜注在弘農澠池縣西魏太和十一年置崤縣唐改硤石廢崤縣為石濠鎮其北有殽山今崤縣故城在

河南府永寧縣北五十里

左傳

晉原軫曰秦違蹇叔而以貪勤民天奉我也秦不可失敵不可縱縱敵患生違天不祥必伐秦

師樂枝曰未報秦施而伐其師其為死君乎先軫曰秦不哀吾喪而伐吾同姓秦則無禮何施之為吾聞之一日縱敵數世之患也謀及子孫可謂死君乎遂發命遽興姜戎于墨衰經梁弘御戎菜駒為右夏四月辛巳敗秦師于殽獲百里孟明視西乞術白乙丙以歸遂墨以葬文公晉於是始墨文嬴請三帥曰彼

實構吾二君寡君若得而食之不厭君何辱討焉使
歸就戮於秦以逞寡君之志若何公許之先軫朝問
秦囚公曰夫人請之吾舍之矣先軫怒曰武夫力而
拘諸原婦人暫而免諸國墮軍實而長寇讎亡無日
矣不顧而唾公使陽處父追之及諸河則在舟中矣
釋左驂以公命贈孟明孟明稽首曰君之惠不以累
臣鸞鼓使歸就戮於秦寡君之以為戮死且不朽若
從君惠而免之三年將拜君賜秦伯素服郊次鄉師
而哭曰孤違蹇叔以辱二三子孤之罪也不替孟
明孤之過也大何罪且吾不以一眚掩大德

公羊

秦伯將襲鄭百里子與蹇叔子諫曰千里而襲
人未有不亡者也秦伯怒曰若爾之年者冢上

之木拱矣爾曷知師出百里子與蹇叔子送其子而
戒之曰爾即死必於殽之嶽嶽是文王之所辟風雨
者也吾將尸爾馬子揖師而行百里子與蹇叔子從
其子而哭之秦伯怒曰爾曷為哭吾師對曰臣非敢

哭君師哭臣之子也弦高者鄭商也遇之般矯以鄭伯之命而犒師焉或曰往矣或曰反矣然而晉人與姜戎要之般而擊之匹馬隻輪無反者

穀梁

秦伯將襲鄭百里子與蹇叔子諫曰十里而襲人未有不亡者也秦伯曰子之冢木已拱矣何

知師行百里子與蹇叔子送其子而戒之曰女死必於般之巖陰之下我將尸女於是師行百里子與蹇叔子隨其子而哭之秦伯怒曰何為哭吾師也二子曰非敢哭師也哭吾子也我老矣彼不死則我死矣晉人與姜戎要而擊之般匹馬倚輪無反者

集說

陸氏淳曰淳聞於師曰晉文公未葬晉襄用師不書曰子而曰人何也曰諸侯之孝在乎保其

社稷而和其民人者也晉為盟主諸侯服之久矣秦不哀其喪而襲其同姓若不能救則先父之業墜矣

故聖人爲之諱許其以權變禮異乎匹夫之孝也
劉氏敞曰其謂之秦何與人之臣而謀其君利人之
喪而襲其國弱人之孤而死其親背大臣而與小臣
圖事貪得地而棄其師也王氏沿曰書敗秦于穀
若晉人敗狄於箕之類也秦伯不納蹇叔之言卒敗
于穀三帥被執喪其師旅害及生民斯貪而無謀者
也程子曰晉不稱君居喪未葬不可從戎也秦爲
無道越晉踰周以襲人衆所共憤故書晉人其稱及
姜戎亦然張氏洽曰左穀作秦師公羊無師字蓋
得聖人之意必有所傳故劉氏胡氏從之也家氏
鉉翁曰秦成鄭乃因成襲鄭鄭人覺之秦兵轉而入
滑晉君臣聞其將不利於己出師邀之敗于穀三帥
皆獲春秋惡秦之用詐責秦重於責晉或曰穀之敗
秦與城濮卻楚同乎曰不同也城濮之戰功在天下
者也穀之戰功在其國者也晉文死而秦伯襲鄭蓋
乘晉之喪其志將以得諸侯其不專為鄭滑明矣使

晉君臣稍不自彊秦將觀其中原遂其欲霸之心幸而文公有子發兵扼而北之秦亦疲敝晉得以世其霸業是雖一國之功不得與城濮同日而語然亦庶幾幹父承考者矣齊桓身死名滅無子也晉文餘威行乎區夏付託得人也論者曰文公受秦穆大惠其嗣遽興師薄人於險非春秋所與其實秦晉之隙兆於合兵圍鄭之日至是晉文身死未寒秦忽襲鄭滅滑晉襄苟置而不問不為忘親事楚之齊孝則為東手就執之宋襄謂之師出無名薄人於險不可也又曰金草變禮憂在宗社墨而即戎未傷於孝晉襄禦秦身不親則師必敗楚攻其南秦扼其西晉之哀可立而待豈小小利害之比乎

案穀之戰左氏載先軫之論是曲在秦也胡傳因程子忘親背惠之言以墨衰即戎為惡之甚又比先軫之謀於杞子則責晉蓋與秦等其於當日情理可謂頗矣秦背晉成鄭自絕前好使晉文不念舊德而從

子犯之請則秦已當擊矣觀不哀吾喪之言是晉文卒而秦不弔也秦則無禮何施之為先軫非過激也至以墨衰即戎為不可則古人有行之者矣徐淮並興魯公山服命師費誓一篇列於周書夫豈不義而聖人取之乎或謂魯拒門庭之寇晉徼鄰國之利不可以竝論此又不考之甚滑今河南府偃師縣殺今河南府陝州滑固近晉而殺則晉境也晉為盟主天下諸侯有相滅亡者雖在遠地猶當救之況乘晉喪踐晉境滅晉切近之同姓以視東郊不啓亦復何異晉之君臣豈得晏然而已乎彼固將繼先君之志為子孫之謀而反斥為忘親可乎自敗殺之後秦不敢越晉而圖東諸侯是敗楚者文之功而制秦者襄之力殺師之烈亞於城濮而顧重訾之必欲晉襄牽已絕之好守居廬之節坐視秦師馳騁四境之近盡諸姬而不恤然後為孝乎然則晉何以書人諱晉子也外以諱為善釋殯而戰是亦有罪焉爾諱而稱人若

晉子未嘗親行者然陸氏淳所謂許其以權變禮異乎匹夫之孝也公穀二家責晉固非而罪秦亦未當蓋秦伯之罪在於用詐襲遠遠諫棄師而必以為亂子女之教無男女之別則過矣今故去胡傳而公穀首末數語皆無取焉程子以書人為衆辭謂秦為不道衆所共憤故書晉人其稱及也亦然此與陸說又異然亦不以書人為罪晉也故並存之

癸巳葬晉文公

集說 高氏閔曰此見襄公父死未葬而尋干戈也
李氏本曰晉先君有文侯重耳復謚為文非禮也

狄侵齊

左傳

因晉喪也

集說

吳氏澂曰三十年狄侵齊傳以為因晉喪狄之所以敢侵

齊者間晉之虞因晉之喪則狄未嘗無畏晉之心也

晉繼狄而莫之攘是為可罪焉耳李氏本曰晉霸

之興未嘗圖狄狄以為不足畏也故文公未

沒而侵齊今又乘晉喪而侵之無忌憚甚矣

案狄因晉間輒出侵齊自是狄有箕之敗然後狄師

三年不敢輕出乃秦與晉交兵三年四戰由是狄侵

秋公子遂帥師伐邾

公伐邾取訾婁

訾子斯反訾婁公作叢穀作訾樓訾婁邾地當在濟寧州界

左傳

公伐邾取訾婁以報升陘之役
邾人不設備秋襄仲復伐邾

胡傳

案左氏公伐邾取訾婁報升陘之役邾人不設備襄仲復伐之此皆不勝忿欲報怨貪得恃彊

陵弱不義之兵也直書其事而罪自見矣或曰取須句訾婁有為之也伐邾至於再三忿母勤矣夫念母者必當止乎禮義平王不撫其民而遠屯戍於母家詩人刺之夫子錄焉僖公以成風之有功於己也越禮以尊其身違義以報其怨殘民動衆取人之邑曾是以為可乎

集說

薛氏季宣曰升陘之役十歲矣邾未始侵伐我

也夏公伐邾取其邑秋公子遂又伐之無名甚矣張氏洽曰僖公懷升陘之忿以晉文方伯而未敢興報怨之師今晉文方沒秦狄內訌故君臣間有

事而文伐邾以取利據事直書其罪見矣趙氏鵬飛曰僖公在位三十三年敗邾者三觀伐邾取邾邑

者二又以公子遂帥師伐之邾本魯附庸自列五等為諸侯不屈於魯故必欲服邾邾終不服也家氏

鉉翁曰齊桓之沒宋楚爭霸魯乘之以伐邾歲至於再今晉文方沒秦晉交兵魯又乘之而伐邾歲至於再每乘伯國之多事而侵陵小國春秋脩書所以貶也

晉人敗狄于箕

箕杜注太原陽邑縣南有箕城今在太谷縣東南三十五里

左傳

狄伐晉及箕八月戊子晉侯敗狄於箕卻缺獲白狄子先軫曰匹夫逞志於君而無討敢不自

討乎免胄入狄師死焉狄人歸其元面如生初臼季使過冀見冀缺耨其妻饁之敬相待如賓與之歸言諸文公曰敬德之聚也能敬必有德德以治民君請用之臣聞之出門如賓承事如祭仁之則也公曰其父有罪可乎對曰舜之罪也殛鯀其舉也興禹管敬仲桓之賊也實相以濟康誥曰父不慈子不祗兄不

友弟不恭不相及也詩曰采葑采菲無以下體君取節焉可也文公以為下軍大夫反自箕襄公以三命命先且居將中軍以再命命先茅之縣賞胥臣曰舉卻缺子之功也以一命命卻缺為卿復與之冀亦未行有軍

冀杜注晉邑今平陽府河津縣東有冀亭水經注云曰季見卻缺轉處今名如賓鄉是也

集說

杜氏預曰卻缺稱人者未為卿許氏翰曰自三十年狄始侵齊晉未暇討自是歲有狄患至

敗於此而後懲艾不復犯畧吳氏澂曰秦晉同圍鄭秦壇及鄭盟晉文不忍伐其師狄嘗侵齊又圍衛晉文俱不救蓋出亡在狄歸國由秦皆嘗受其惠也今晉襄紹伯惟恐伯威不立而伯業遂衰故汲汲焉以衰服從戎既敗秦而又敗狄也

案箕之役晉侯先軫在焉杜氏預以卻缺未為卿故書晉人豈卻缺實獲白狄子故以卻缺敗狄告於諸侯耶若如陳氏傳良家氏鉉翁謂狄病齊衛晉為盟主而不能救故貶書人則非也狄圍衛衛旋侵狄及狄盟矣狄再侵齊一則曰狄間晉之有鄭虞一則曰狄因晉喪皆非無故而不救也

冬十月公如齊

集說

高氏閔曰公本事齊逮晉文伯而受盟焉至是晉文已卒齊侯一使卿來聘而公遂往朝之蓋

魯因晉喪既伐邾矣故懼晉而改事齊也張氏洽曰比事觀之間晉而虐邾所以因齊聘而朝之以自

託也家氏鉉翁曰天王聘不往朝國歸父來乃躬報謝不加貶而義自見矣李氏廉曰晉襄初立伯

事未定秦之窺鄭齊之聘魯皆有志於爭伯也晉襄唯外患之是憂而置齊魯之交於度外故不踰年而

伯事復盛焉亦善於繼承者矣春秋書敗秦敗狄如齊伐許於一年之間其晉伯絕續之會三強睥睨之歟

十有二月公至自齊

集說

汪氏克寬曰天王使宰周公來聘以三公冢宰之重下臨於魯實非常之禮也僖公不能入覲

京師恭拜寵光而使公子遂報聘又以二事出幾若邾滕之交爾今齊侯使國歸父來聘不過交鄰之常禮命大夫往荅其勤斯云可矣顧乃躬往朝之於所厚者薄而其所薄者厚也

乙巳公薨於小寢

左傳

冬公如齊朝且弔有狄師也反薨于小寢即安也

穀梁

小寢非正也

胡傳

左氏曰即安也周制王宮六寢路寢一小寢五君日出而眡朝退適路寢聽政使人眡大夫退

然後適小寢釋服是路寢治事之所也而小寢燕息之地也公羊以西宮為小寢魯子以諸侯有三宮則列國之制蓋降於王其以路寢為正則一爾君終不於路寢則非正矣曾子曰吾得正而斃又何求哉古

人貴於得正乃如此凡此直書而義自見矣

集說

楊氏士勛曰傳發此例者以隱公不地桓公非正今僖公雖卒而沒於婦人之手故發傳以惡

之也

劉氏敞曰小寢者何燕寢也男子不絕於婦人之手婦人不絕於男子之手以齊終也薨於小寢

非正也

李氏廩曰僖公在位三十三年實為魯之賢君當其初歲內用公子友臧文仲外則堅事齊桓

故能去慶父之姦蠹使魯國既危而復安自十七年以前除從齊會盟征伐外魯事之見經者甚少觀詩之所頌如務農重穀則勤於為民也春秋享祀則謹於奉先也立閼宮復泮宮克淮夷牧野雖一時夸大之辭有過其實然禮樂政事之修明君臣上下之協洽榮可想矣但盟檉未返遽有邾師之敗葵丘稍急遽肆陽穀之樂則公豈真能以禮信輔齊耶厥後宋襄繼起雖其伯事有不足以得魯然與其南向以從楚孰若尊獎先代協贊姻鄰以為列國之重乃乞師荆楚導之以伐齊宋其失大矣蓋自十六年季友卒後臧文仲之竊位公子遂之專權如滅項會楚之失備見於經向非晉文肇造一戰勝楚則中原之禍僖公何以道其責哉況乎季友受費而季孫氏始公孫茲帥師而叔孫氏始公孫敖帥師而孟孫氏始三桓之基皆肇於僖公之編則僖公亦魯國功之首罪之魁也歟

隕霜不殺草李梅實

隕公作實

公羊

何以書記異也何異爾不時也

穀梁

未可殺而殺舉重也可殺而不殺舉輕也實之為言猶實也

胡傳

哀公問於仲尼曰春秋記隕霜不殺草何為記之也曰此言可殺也夫宜殺而不殺則李梅冬

實天失其道草木猶干犯之而況君乎是故以天道言四時失其序則其施必悖無以統萬象矣以君道言五刑失其用則其權必喪無以服萬民矣

集說

何氏休曰周之十二月夏之十月也易中孚記曰陰假陽威之應也早實霜而不殺萬物至當

實霜之時根生之物復榮不死斯陽假與陰威陰威列索故陽自實霜而反不能殺也此祿去公室政在

公子遂之應也。孔氏頴達曰：此云「隕霜不殺草，定元年冬十月隕霜殺菽」，梁傳曰：「未可以殺而殺，舉重可殺而不殺，舉輕其意言菽重草輕也。」孫氏復曰：「不時也，五行傳曰：『視之不明，是謂不哲。』」廐罰常燠，時則有草木妖。劉氏敞曰：九月其卦為剝，剝落萬物，始大殺矣。明陰從陽，命臣受君令而後殺也。隕霜不能殺草，此君誅不行，舒緩之應也。杜氏諤曰：春秋詳記災異，不遺微細，所以謹人君之戒也。此隕霜不殺草，李梅實從而錄之者，因以明天地之應陰陽之大生殺動植之類，皆繫人君之德，必詳志之以示戒爾。孫氏覺曰：陰陽四時之氣，天地所以生殺萬物者也。雨露生之，雪霜殺之，天地自然之氣，而四時之常也。皇極之道行而和氣塞於天地之間，則陰陽有常而生殺以時，彝倫攸斁，天過於陰，陽則當生者不生，當殺者不殺。許氏翰曰：僖公寬仁過厚，其失也豫，而文公以闇弱繼之。三桓之盛，自僖公始，卒以

專魯咎徵著矣 黃氏仲炎曰經書隕霜二一曰隕霜不殺草一曰隕霜殺菽蓋周之十二月夏之十月也霜當殺草而不殺草異也周之十月夏之八月也未當隕霜而殺菽亦異也又曰李梅冬實物反常矣

梅 吳氏澂曰霜當重而不能殺草李梅再花而結成實皆冬暖之咎徵也

案胡傳既用孔子對哀公隕霜之言又引孔子責宰我論社之語以為在聖人則能處變而不失其常在賢者則必有小貞吉大貞凶之戒斯言非也春秋垂教萬世人人所當奉若豈必聖人乃可用賢者遂不可用耶蓋失道之對乃法天之常理戰栗之言非立社之本意權不可下移而威不可偏勝道固並行而不悖也故節去之

晉人陳人鄭人伐許

左傳

晉陳鄭伐許討其貳於楚也

集說

卓氏爾康曰許從楚最堅雖晉文霸業方盛而溫會翟泉盟皆不能致其來即以諸侯圍之猶

然弗服蓋深信楚之可恃也嚴氏啓隆曰許自此服晉至宣十二年敗邲後復事楚

案左止稱晉陳鄭伐許而已是君與卿未親行也稱人自是將卑師少不必別立議論是時與晉抗者秦楚狄也襄既敗秦狄故圍許以震楚家氏謂非急務亦不審於事勢矣

附錄左傳


楚令尹子上侵陳蔡陳蔡成遂伐鄭將納公子瑕門於桔柣之門瑕覆於周氏之汪

外僕髡屯禽之以獻文夫人飲而奠之鄆城之下晉陽處父侵蔡楚子上救之與晉師夾泝而軍陽子

患之使謂子上曰吾聞之文不犯順武不違敵子若欲戰則吾退舍子濟而陳遲速唯命不然紆我老師

費財亦無益也乃駕以待子上欲涉大孫伯曰不可
晉人無信半涉而薄我悔敗何及不如紆之乃退舍
陽子宣言曰楚師遁矣遂歸楚師亦歸太子商臣諧
子上曰受晉賂而辟之楚之恥也罪莫大焉王殺子
而祔葬僖公緩作主非禮也凡君薨卒哭

鄆杜注故鄆國在滎陽密縣
東北今縣屬河南開封府



欽定春秋傳說彙纂卷十六

欽定四庫全書

經部

欽定春秋傳說彙纂卷十七

詳校官監察御史_臣陳化龍

給事中_臣溫常綬覆勘

總校官進士_臣繆琪

校對官中書_臣施光輅

謄錄監生_臣孫慰祖

欽定四庫全書

欽定春秋傳說彙纂卷十七

文公

集說

楊氏士勛曰魯世家文公名興僖公之子以襄五十六年即位謚法慈惠愛民曰文

乙襄王二十六年

元年

晉襄二年齊昭七年衛成九年蔡莊二十年鄭穆二年曹共二十七年陳共六

年杞桓十一年宋成十一年秦穆三十四年楚成四十六年

春王正月公卽位

穀梁

繼正即位正也

胡傳

即位者告廟臨羣臣也國君嗣世定於初喪必逾年然後改元書即位者緣始終之義一年不

二君緣民臣之心不可曠年無君

集說

杜氏預曰先君未葬而公即位不可曠年無君范氏甯曰繼正謂繼正卒也隱去即位以見

讓桓書即位示安忍莊閔僖不言即位皆繼弑氏穎達曰釋例曰遭喪繼立者每新年正月必改元

正位百官以序故國史書即位於策以表之文公成公先君之喪未葬而書即位因三正之始明繼嗣之

正表朝儀以固百姓之心此乃國君明分制之大禮譬周康王麻冕黼裳以行事事畢然後反喪服也雖

踰年行即位之禮名通於國內必湏既葬卒哭乃免喪古之制也啖氏助曰嗣子爲君明年正月朔就

位南面改元高氏閔曰文成定即位於未葬之前皆稱公者既踰年也一年不可二君故終年稱子又

不可曠年無君故踰年雖未葬稱公也朱子曰天子諸侯之禮與士庶人不同故孟子有吾未之學之語謂此類耳如伊訓元祀十有二月朔亦是新喪伊尹以奉嗣王祇見厥祖固不可用凶服矣漢唐新主即位皆行冊禮君臣亦皆吉服追述先帝之命以告先君蓋易世傳授國之大事當嚴其禮而王侯以國為家雖先君之喪猶以為已私服也黃氏翰曰人君即位之別有四始死正嗣子之位既殯之後嗣君即繼體之位君踰年合正改元之位三年合正踐阼之位如春秋書元年即位則是踰年正改元之位也月正元日舜格于文祖伊尹以冕服奉嗣王歸于亳則是三年正踐阼之位也然崩薨之日或在歲終則蓋有未殯而踰年者矣家氏鉉翁曰即位必以歲首改元亦必以歲首若歲首不書即位而餘月書之則非元年正始之義李氏廉曰魯自隱至文六君惟文公承國於先君得書即位汪氏克寬曰文定

及九峰蔡氏皆以即位之事冢宰攝告廟攝臨羣臣
朱子則以他事可攝即位不可攝而又謂嗣君以先
君之喪為已私服其意蓋欲權一時之宜如借
吉之例以繼世正統而三年之服不可廢也

案胡傳據高宗諒陰之說援引虞商二書以為冢宰
攝告廟臨羣臣而人主不親其事今以朱子之言考
之則他事可攝即位不可攝乃不易之定論也曾子
問總服不祭則踰年告廟或使他人攝之若即位改
元而臨羣臣萬無可攝
之理故今不從胡傳

二月癸亥日有食之

公日上
有朔字

集說

杜氏預曰癸亥月一日不書朔官失
趙氏鵬飛曰不書朔失其朔也

天王使叔服來會葬

左傳元年春王使內史叔服來會葬公孫敖聞其能相人也見其二子焉叔服曰穀也食子難也收

子穀也豐下必有後於魯國

公羊其言來會葬何會葬禮也

穀梁葬曰會其志重天子之禮也

胡傳凡崩薨卒葬人道始終之大變也不以得禮爲常事而不書其或失禮而害於王法之甚者聖人則有削而不存以示義者矣

集說周禮職喪掌諸侯之喪杜氏預曰叔氏服字諸侯喪天子使大夫會葬禮也孔氏穎達曰

蘇氏云外卿來會葬不書此書者尊王使故特書之傳稱內史叔服內史於周禮爲中大夫天子大夫例

書字知叔氏服字也高氏閔曰葬者臣子之事會葬者諸侯相送終之辭也天王惟有弔贈含祔之禮今使叔服來會葬是自同於諸侯也黃氏仲炎曰桓王崩七年而後葬見諸侯不恤天子之喪也僖公以夏四月葬而王使叔服先二月至魯見天子急於奉諸侯之喪也冠屨倒置至此極矣家氏鉉翁曰天子所以厚諸侯是以無貶桓公之薨王使榮叔錫命王不稱天爲追命篡賊而貶也成風之葬召伯來會王亦不稱天以其用夫人之禮於妾母而譏之也僖公魯之賢君書天王使叔服來會葬無貶也俞氏皋曰天王使會葬惟一見經其餘則知其不會也汪氏克寬曰諸侯五月而葬僖公薨至是三月而王臣來會葬者豈王室謹禮以懷諸侯惟恐失期而先至也歟僖公未嘗遣使會惠王之葬而襄王遣使以觀得失見矣

附錄左傳

於是閏三月非禮也先王之正時也履端於始舉正於中歸餘於終履端於始序則

不愆舉正於中民則不惑歸餘於終事則不悖

夏四月丁巳葬我君僖公

左傳

夏四月丁巳葬僖公

穀梁

薨稱公舉上也葬我君接上下也僖公葬而後舉諡諡所以成德也於卒事乎加之矣

天王使毛伯來錫公命

左傳

王使毛伯衛來錫公命

公羊

錫者何賜也命者何加我服也

穀梁

禮有受命無來錫

胡傳

諸侯終喪入見則有錫歲時來朝則有錫能敵

之者也禮所謂喪畢以士服見天子已見賜之黻冕

圭璧然後歸是已車馬衰黻因其歲時來朝而錫之

者也詩所謂君子來朝何錫予之雖無予之路車乘

馬又何予之玄衮及黻是已彤弓彤矢因其敵愾獻

功而錫之者也詩所謂彤弓彤矢受言藏之我有嘉

賓中心貺之鍾鼓既設一朝享之是已今文公繼世

喪制未畢非初見繼朝而獻功也何為來錫命乎

故穀梁子曰禮有受命無來錫命來錫命非正也

集說杜氏預曰毛國伯爵諸侯爲王卿士者諸侯即

侯命亦其比也孔氏穎達曰僖二十四年傳有原

伯毛伯杜云原毛皆采邑此毛與彼計是一人而注

不同者此毛當是文王之子封爲畿外之國於時諸侯無復有毛或是世事王朝本是絕滅從此以後常稱毛伯國名尚存仍爲伯爵必受得采邑爲畿內諸侯故注彼云采邑此云國也封爵既存故云諸侯爲王卿士者周禮大宗伯以王作六瑞以等邦國王執鎮圭公執桓圭侯執信圭伯執躬圭子執穀璧男執蒲璧冬官玉人桓圭以下皆謂之命圭是用之以命諸侯也諸侯即位天子賜之以命圭魯是侯爵當賜之以信圭也王人又云天子執冒四寸以朝諸侯其冒邪刻其下與圭頭相合諸侯執圭以朝天子天子執冒以冒之觀其相當以否所以合瑞爲信也僖十一年晉惠公新立王賜之命此亦新立是其比也劉氏敞曰錫命者何命爲諸侯也諸侯在喪稱子踰年即位終喪受命正也未畢喪命之非正也既畢喪不受命亦非正也程氏端學曰文公在衰絰中安然受之而不辭毛伯不諫而從君之命皆非也李

氏廉曰杜氏以為諸侯初即位天子錫以命圭如侯
執信圭之類公羊以為賜以命服以晉惠初立王賜
之命而晉侯受王情證之則杜氏得之晉武公以請
命於王而詩人有子之衣安且吉之辭證之則公羊
亦得之故胡氏取禮經黻冕圭璧之說然後其義始
備汪氏克寬曰諸侯之嫡子必誓於王以為世子
及其君薨必告於王王遣使省其終事遂命世子嗣
為諸侯三年喪畢乃以士服入京師見天子於廟而
受命焉未受命不敢服其服已見天子錫之黻冕之
服與命圭合瑞於是服之以歸設奠於祖廟然後臨
其臣民焉春秋諸侯立世子既不誓於王及其嗣位
又不請命於京師王不能罪因而命之兩失之矣公
羊以錫命為加服劉氏辨其非或者謂命為諸侯非
賜命服并文定之說為疑夫黻冕圭璧乃所以命為
諸侯也蓋天王之錫命有以始立而錫命者有以有
功而錫命者有既沒而追命之者此年毛伯錫命及

虢公命曲沃武公爲晉侯召武公賜晉惠公命皆始
立而賜命者也召伯廖賜齊桓公命尹氏王子虎內
史叔興父策命晉文公皆以其有功而錫命者也榮
叔錫桓公命及成簡公追命衛襄公皆既死而追命
之者也若召伯之賜成公命則始立未賜命歷八年
而後命之耳劉定公之賜齊靈公命雖非有功王將
娶於齊故以私恩命之也春秋之書錫命莫非譏耳
苟謂諸侯不往拜命爲貶而天王之錫命無責則曷
爲不待其來見而命之哉

晉侯伐衛

左傳侵晉文公之季年諸侯朝晉衛成公不朝使孔達
伐衛及南陽先且居曰效尤禍也請君朝王臣從師
晉侯朝王於溫先且居胥臣伐衛五月辛酉朔晉師

圍戚六月戊戌取之獲孫昭子

匡杜注在潁川新汲縣東北今河南開封府扶溝縣西有匡城戚杜注衛邑在頓丘衛縣西今直

隸大名府開州北
七里古戚城

集說

王氏沿曰衛成怨晉文執歸京師故季年不朝而且侵其鄰國示不從盟主也襄公嗣位欲修

伯業先以衛侯之罪告於諸侯復聽且居之言朝於王所乃命大夫伐衛取其戚田諸侯於是畏威復歸於晉昔年齊桓公卒五公子爭立霸業遂廢今襄公克繼父功繼爲盟主首能威服諸侯故春秋書曰晉侯伐衛貴之也陳氏傳良曰春秋苟其君意雖卿帥不書故伐衛書晉侯不書先且居成十三年伐秦書晉侯不書樂書襄十年滅偁陽書晉侯不書荀偃士匄哀元年代晉書衛侯不書孔圉所謂深探其本

也趙氏鵬飛曰襄公即位之初遽能伐叛討貳以求諸侯聖人許而爵之衛不能屈尚有報怨之師聖人於衛伐晉則書人貶衛也貶衛所以予晉也鄭氏玉曰晉侯為伐衛而行故書晉侯伐衛不為朝王故不書朝王汪氏克寬曰文宣以後大夫專政凡征伐會盟君雖在而大夫任其事故經書晉侯而傳言大也

叔孫得臣如京師

左傳叔孫得臣如周拜

集說杜氏預曰謝賜命得臣叔牙之孫杜氏諤曰受王之寵命苟躬躬朝於京師猶曰緩也況不朝而使卿拜命乎故直書以示譏趙氏鵬飛曰拜錫命也錫固非所宜錫而拜錫者庸為是乎錫之在喪

拜之在喪既拜則釋衰服韍矣釋衰服韍文公之心
其安乎安則爲之家氏鉉翁曰拜錫命也在喪不
能躬往使臣可也除喪朝王然後於禮爲盡而文公
循習舊事不能往也汪氏克寬曰文公之立天子
既使大夫會僖公之葬又使襄內諸侯來錫命不親
往拜而僅使得臣焉襄王猶不之罪且使榮叔歸成
風舍贈繼使召伯會成風葬而文公在位十有八年
歷襄頃匡王三世終其身不朝於京師觀春秋所書
比事以考之其
罪不可掩矣

衛人伐晉

左傳衛人使告於陳陳共公曰更伐
之我辭之衛孔達帥師伐晉

集說劉氏敞曰左氏曰君子以爲古古者越國而謀
非也古者雖越國而謀所謀者必義事也今陳

與衛何謀哉謀叛命侵小者也謀畔命侵小是非古
矣何以謂之古呂氏本中曰嘗聞以小事大者未
聞以小而謀大者也以小而謀大滅亡之道也張
氏洽曰霸主聲罪致討不自反其不仁無禮之罪乃
稱兵報伐故書人罪孔達也趙氏鵬飛曰春秋之
時所宗者霸主爾聖人豈苟抑諸侯而私霸主哉存
霸主所以使諸侯有所宗也今衛成抗霸主而伐之
是亦犯上矣故聖人於晉伐衛書侯而衛伐晉書人
均諸侯也貶衛而予晉者存霸主也李氏廉曰春
秋與國伐霸者三衛人伐晉齊侯伐衛遂伐晉齊侯
衛侯伐晉皆有關於衛汪氏克寬曰春秋
不書晉之取戚而人孔達予晉而罪衛也

秋公孫敖會晉侯于戚

此大夫專會諸侯之始

左傳

秋晉侯疆戚田故公孫敖會之

集說孔氏穎達曰僖二十九年翟泉之盟諸侯之卿
而春秋魯大夫皆不貶者貶他國之卿以成體例體
例已舉於魯不須加貶理足可明故據用魯史成文
不復改易也趙氏鵬飛曰三家之子孫雖自僖公
而僖之世莫見其橫蓋僖所不容也及文公之初則
已專盟會矣孟氏自教而專叔孫氏自得臣彭生而
橫季孫氏自行父而侈教慶父之子得臣彭生皆子
牙之孫而行父季友之孫也吳氏澂曰凡魯卿會
外君直書不隱以見其非程氏端學曰諸侯非王
命自爲會罪也況魯國有喪以大夫而會霸主乎晉
襄居喪而下會大夫亦非禮也李氏廉曰內大夫
特會外諸侯五教會晉侯于戚行父會齊侯陽穀歸
父會齊侯于穀歸父會楚子于宋叔弓會楚子于陳
也此為大夫特會諸侯之始而胡
氏特發傳於歸父之下不知所謂

冬十月丁未楚世子商臣弑其君頹

頹俱倫反公穀作髡

左傳

初楚子將以商臣爲大子訪諸令尹子上子上曰君之齒未也而又多愛黜乃亂也楚國之舉

恒在少者且是人也蠹目而豺聲忍人也不可立也弗聽既又欲立王子職而黜大子商臣商臣聞之而未察告其師潘崇曰若之何而察之潘崇曰享江芊而勿敬也從之江芊怒曰呼役夫宜君王之欲殺女而立職也告潘崇曰信矣潘崇曰能事諸乎曰不能行乎曰不能能行大事乎曰能冬十月以宮甲圍成王王請食熊蹯而死弗聽丁未王縊謚之曰靈不瞑曰成乃瞑穆王立以其爲大子之室與潘崇使爲大師且掌環列之尹

集說

何氏休曰楚無大夫言世子者甚惡世子弑父之禍也不言其父言其君者君之於世子有父

之親有君之尊言世子者所以明有父之親言君者所以明有君之尊又責臣子當討賊也啖氏助曰楚僭號已久世子必不誓於天子今以商臣之逆故特書世子以明其罪劉氏敬曰穀梁曰日髡之卒所以謹商臣之弑也非也即不日者乃不謹商臣之弑乎王氏葆曰顯亦弑其兄熊羆而得位者終不免商臣之禍天道好還豈不昭然陳氏傳良曰楚國未志其志顯何世子弑君不可以楚不志也家氏鉉翁曰子上之言忠矣楚成能用之豈有是乎有國家者不可不知所戒耶王氏錫爵曰傳謂謚靈弗暝改成乃暝君薨舉謚常在葬時安得謚於未殯之日此左氏之鑿也

案唐郭瑜對世子弘謂春秋義存褒貶以善惡為勸戒故商臣千載而惡名不滅此正合於聖人之旨所謂春秋成而亂臣賊子懼也弘天性仁愛故卒不忍讀耳非瑜誤陳經義以春秋為可廢也胡傳深貶其

說謂身後惡名不足以繫亂賊之邪志而懲於為惡
又曲引董子之論寬篡弑嚴首惡累數楚成之罪而
以商臣為不待貶是亂春秋之
名分失輕重之權衡也故不錄

公孫敖如齊

左傳

穆伯如齊始聘焉禮也凡君即位卿出竝聘踐
修舊好要結外援好事鄰國以衛社稷忠信卑

讓之道也忠德之正也信
德之固也卑讓德之基也

集說

何氏休曰書者譏喪娶吉凶不相干高氏閔
曰會晉歸而復聘齊魯人於是兩事齊晉且圖

婚於齊故也

汪氏克寬曰左氏於凡諸侯朝聘悉
以為禮既不察其不能謹天下之通喪又不考其尊

周交鄰之疏數僖公三十年宰周公來聘而公子遂
報聘於京師且初聘於晉此年毛伯錫命則得臣往

拜而教亦初聘於齊比
事以觀不貶而惡自見

案諸侯在喪惟不親與於會盟耳若使臣以往未為
不可邦交有常期往來有定禮三年之久安能杜封

疆絕賓禮耶權衡駁左氏太過惟汪氏以尊周
交鄰之疏數為言似亦有理故與左氏竝存

附錄左傳

穀之役晉人既歸秦帥秦大夫及左右皆
言於秦伯曰是敗也孟明之罪也必殺之

秦伯曰是孫之罪也周芮良夫之詩曰大風有隧貪
人敗類聽言則對誦言如醉匪用其良覆俾我悖是

貪故也孫之謂矣孫實貪以
禍夫子夫子何罪復使為政

丙襄王二年晉襄三年齊昭八年衛成十年蔡莊二
申十七年二年十一年鄭穆三年曹共二十八年陳共

七年杞桓十二年宋成十二年秦
穆三十五年楚穆王商臣元年

春王二月甲子晉侯及秦師戰于彭衙秦師敗績彭衙杜注

馮翊郃陽縣西北有彭衙城在今陝西
安府白水縣東北六十里漢於此置衙縣

左傳

二年春秦孟明視帥師伐晉以報殽之役二月
晉侯禦之先且居將中軍趙衰佐之王官無地

御戎狐鞠居爲右甲子及秦師戰于殽也晉梁弘御戎萊駒爲
晉人謂秦拜賜之師戰于殽也晉梁弘御戎萊駒爲
右戰之明日晉襄公縛秦囚使萊駒以戈斬之囚呼
萊駒失戈狼睥取戈以斬囚禽之以從公乘遂以爲
右箕之役先軫黜之而立續簡伯狼睥怒其友曰盍
死之睥曰吾未獲死所其友曰吾與女爲難睥曰周
志有之勇則害上不登於明堂死而不義非勇也共
用之謂勇吾以勇求右無勇而黜亦其所也謂上不
我知黜而宜乃知我矣子姑待之及彭衙既陳以其
屬馳秦師死焉晉師從之大敗秦師君子謂狼睥於

是乎君子詩曰君子如怒亂庶遄沮又曰王赫斯怒爰整其旅怒不作亂而以從師可謂君子矣秦伯猶用孟明孟明增修國政重施於民趙成子言於諸大夫曰秦師又至將必辟之懼而增德不可當也詩曰母念爾祖聿修厥德孟明念之矣念德不怠其可敵乎

集說何氏休曰稱秦師者愍其衆惡其將前以不用敵君不正者賤之不嫌得敵君劉氏敞曰戰而言及者主之者也猶曰晉侯為志乎為此戰也程子曰越國襲人秦罪也忘親背惠晉惡也秦經人之國以襲人雖忿無以為辭矣故其來不稱伐晉不論秦而與戰故書晉及忿以取敗故書敗績黃氏仲炎曰秦穆公反自殽陵悔過自誓未幾尋怨再致彭衙之衄是雖悔其非而未嘗改也悔而不改何取於悔哉晉襄得志於殽可以已矣當秦兵再至則修文告

以郤之若展禽所以犒齊師者秦必愧而反矣不此
之圖而逞志於再戰是則晉襄之罪也蓋秦穆憤於
敗而不能平晉襄扭於勝而不能屈血氣用事而無
理義以養其心終於稔怨結讎黷武殘民而已春秋
書秦晉之戰所以爲世之不能懲忿窒慾者之戒嚴
矣哉趙氏鵬飛曰前日穀之役兵端實起於秦秦
不入滑則晉不敗秦也穀之敗穆公歸而悔過自咎
可謂賢矣然悔其敗而治戎練卒以圖再舉則是禍
方深矣何悔之有其後三十年秦晉之戰無虛歲兵
連禍結荼毒生民皆起於秦穆之悔不悔於德而悔
於力其所以悔者非其道也程氏端學曰秦穆邀
利以取敗不自悔責而事報復又取敗績其罪著矣
晉襄公忘喪而主乎此戰雖勝無足道矣汪氏克寬
曰王氏云彭衙秦地而晉師在焉亦知晉之欲戰矣
案胡傳謂敵加於己己有罪焉則引咎責躬已無罪
而不義見加則諭之以辭命猶不得免焉亦告之天

子方伯若遽然興師與戰是謂以桀攻桀斯言也可謂閭於事情矣當時周室衰微雖告於天子豈能止侵伐之暴胡氏固嘗有言天子能治諸侯則春秋不復作矣若謂告於方伯則晉固霸主也自襄王彤弓之賜文固始霸襄實繼霸鄰國有相侵伐者晉猶當起而問之況敵加於己乎敵加於己必待告於天子方伯而後應焉則敵已造其國都而宗社墟矣胡氏之說今無取焉

丁丑作僖公主

左傳

丁丑作僖公主書不時也

公羊

作僖公主者何爲僖公作主也主者曷用虞主用桑練主用栗用栗者歲主也作僖公主何以

書譏何譏爾不時也

穀梁

作爲也爲僖公主也立主喪主於虞吉主於練

壞廟壞廟之道易

檐可也

改塗可也

胡傳

作主者造木主也既葬而反虞虞主用桑期年而練祭練主用栗用栗者藏主也何以書僖公

薨至是十有五月然後作主慢而不敬甚矣夫慢而不敬積惡之原也以爲無傷而不去至於惡積而不可掩所以謹之也

集說

何氏休曰禮平明而葬日中而反虞以陽求陰謂之虞者親喪已下壙皇皇無所親求而虞事

之虞猶安神也用桑者取其名所以副孝子之心期年練祭埋虞主於兩階之間易用栗也夏后氏以松殷人以柏周人以栗禮士虞記桑主不文吉主皆刻而謚之藏於廟室中常所當奉事也禮作練主當以

十三月 劉氏敞曰譏不時也其不時奈何古者蓋葬而虞期而練喪事即遠天下之達禮也過之者猶不及也又曰公羊曰刺欲久喪而後不能非公自情緩不作主爾何以知其欲久喪 杜氏諤曰十二公作主祔廟未嘗書之今書作僖公主必有所譏也高氏閔曰周人卒哭而祔而僖公主是謂虞主既期而練練而易主是謂練主僖公薨十有五月非虞練之時而方作主猶未祔廟也猶未祔廟者欲躋之故也 張氏洽曰事亡如事存故作主以象神而祭之禮既葬作主於墓不終日而虞祭不忍一日忌親也僖公元年四月葬今乃作主慢而違禮甚矣家氏鉉翁曰逆祀有萌議論未定緩於作主以是故也汪氏克寬曰左氏云卒哭而祔服氏云造木主立几筵焉特祀在寢三年喪畢遭烝嘗乃於廟鄭氏又云惟祔與練祭在廟祭訖主反於寢其大祥與禫祭其主自然在寢祭之穀梁謂吉主於練於練馬壞廟

則待練而始祔今考檀弓云殷既練而祔周卒哭而祔孔子善殷竊謂祔廟則當吉祭苟卒哭而遷廟遽用吉祭不近人情故文定取穀梁言練祭易栗主而後祔廟也

三月乙巳及晉處父盟

因朝而盟始此

左傳

晉人以公不朝來討公如晉夏四月己巳晉人使陽處父盟公以恥之書曰及晉處父盟以厭

之也適晉不書諱之也

公羊

此晉陽處父也何以不氏諱與大夫盟也

穀梁

不言公處父仇也爲公諱也何以不言公之如晉所恥也出不書反不致也

胡傳

及處父盟者公也其不地於晉也諱不書公者抑大夫之仇不使與公爲敵正君臣之分也適

晉不書反國不致爲公諱恥存臣子之禮也凡此類筆削魯史之舊文衆矣

集說

杜氏預曰處父爲晉正卿不能匡君以禮而親與公盟故貶其族去則非卿故以微人常稱

爲耦以直厭不直不地者盟晉都孔氏穎達曰春秋卿則書名氏賤者則稱人外卿之貶例皆稱人魯卿之貶乃去其族去族與稱人相類即是不爲卿也處父爲晉正卿不能匡君使盟魯即從君命親與公盟故貶去其族然則不貶處父稱人者貶之稱人則惡名不見貶其族留其名所以惡處父也釋例曰隨此稱人則所罪之名不章故特書處父也翟泉澶淵亦會公侯所以稱人者以其衆卿非一依例總貶陸氏淳曰淳聞於師曰凡大夫與公盟若非彼彊逼我而盟例但書人言非大夫之罪也今晉逼公令與大夫盟故特書其名以見其罪劉氏敞曰穀梁曰何以知其與公盟以其日也非也公盟不日

者多矣何以能必之杜氏諤曰高僎之盟主在於公而此主在處父也高氏閔曰凡盟必書地惟他國大夫來魯盟及魯大夫往他國盟不地蓋各於國中故也陳氏傳良曰朝而遂盟之於是始凡諱國惡恥在公則但書其事不書公者恒辭也諱在其事則但書公不書其事公會晉侯於黑壤爲公不與盟故不書盟公如晉爲止公送葬故不書葬甚諱之也張氏洽曰盟於晉之都而君不出恥甚矣故諱之趙氏孟何曰齊晉伯業盛時未嘗使諸侯受盟於其國魯閔公襄公童子侯也桓公出盟閔于落姑悼公出盟襄于長樗不敢以非禮加於列國也魯君如伯國受盟自文公始而晉襄怒其不朝使其大夫盟公以恥之晉卑諸侯甚矣家氏鉉翁曰魯喪未除晉責之以朝魯當以禮拒之而冒喪而朝所以愈受欺於彊國春秋去處父族非特爲魯諱亦責晉也李氏廉曰處父之仇與高僎之仇一也處父去氏而

高倭存族者彼於防而此於晉也何氏曰親就其國恥不得其君故使若得其君也又曰處父繫國而去氏荀庚良夫等繫氏而去國者此兼罪晉侯之失彼止罪大夫之專也汪氏克寬曰抑大夫之仇與及高倭荀庚孫良夫卻犇孫林父向戌同晉時以處父辱公故又去氏

夏六月公孫敖會宋公陳侯鄭伯晉士穀盟于垂隴

穀木反穀作穀垂隴公穀作垂斂垂隴杜注鄭地榮陽縣東有隴城京相璠曰榮陽東二十里今在河南

開封府榮澤縣東北

左傳

公未至六月穆伯會諸侯及晉司空士穀盟于垂隴晉討衛故也陳侯爲衛請成於晉執孔達

說以

穀梁

內大夫可以
會外諸侯

集說

杜氏謂曰春秋盟會未有外大夫別會於諸侯者垂隴之會譏政在於大夫也桓文之霸或盟

王人或致天子是天子受制於諸侯也春秋不與之
故書王人以先諸侯晉襄紹霸致諸侯而大夫會之
是諸侯受制於大夫也春秋亦不與之故序諸侯以
先士穀許氏翰曰明年衛人會晉伐沈則知衛服
於垂隴之會矣陳氏傳良曰大夫而敵諸侯於是
始晉遂以大夫主諸侯也然士穀主盟曷爲序諸侯
之下春秋不以大夫主盟也故訖於宋不以大夫主
盟翟泉貶此何以不貶貶不於甚則於其事端餘實
錄而已矣故書士穀自書士穀而後凡役書大夫桓
文之伯會盟有大夫則但稱人會檉稱邾人會溫稱
秦人必世子也則得次小國之君自垂隴主士穀新
城主趙盾而後大夫與諸侯序戚之盟書齊國佐沙

隨之會書宋華元甚者無伯而安甫之會君與大夫
竝列矣薛氏季宣曰垂隴之會士穀始專晉國之
事也桓文沒大夫擅專諸侯之會盟自公孫叔士穀
始也其臣固有罪也使之者亦非也黃氏仲炎曰
晉士穀會盟諸侯晉政在大夫也家氏鉉翁曰天
子命上公董諸侯之成此東遷以後之變禮非盛時
所行晉襄使其臣盟公侯自是爲例春秋書其僭
吳氏澂曰晉以士穀主盟魯以公孫叔伋三國之君
皆非禮也故書以譏之衛敢於伐盟主者孔達之罪
也今陳侯爲請而執孔達衛服其罪故免於晉之伐
也程氏端學曰士穀以襄公之命盟諸侯則是大
夫主盟也禮樂征伐自大夫出矣又曰案伯者之大
夫盟自僖二十九年翟泉之盟始至此則士穀主諸
侯矣李氏廉曰內大夫出盟諸侯自柔始繼而公
子結及齊宋又繼而公孫叔會三國矣王氏錫爵
曰既命之卿例皆書名奚堪與不堪之論哉陳氏

際泰曰翟泉以列國之大夫盟王臣大夫張也見諸侯之輕天子也垂隴以伯主之大夫盟諸侯大夫張也見伯主之輕諸侯也

自十有二月不雨至于秋七月

穀梁

歷時而言不雨文不憂雨也不憂雨者無志乎民也

胡傳

書不雨至于秋七月而不曰至于秋七月不雨者蓋後言不雨則是冀雨之辭非文公之意也

夫書不雨至于秋七月而止即八月嘗雨矣然而不書八月雨者見文公之無意於雨不以民事繫憂樂

也其急於政事可知而魯衰自此始矣

集說

趙氏鵬飛曰不雨者數月而文公不一念及其志荒矣僖公一月不雨必書見其有愛民之心

也六月雨亦書知其有喜雨之志也今自十二月不
雨至于秋七月文公蓋以爲旱無與乎已也不雨至
於秋七月則八月雨矣雨亦不書以見文無復喜雨
爲無益於我也以此觀之僖文父子之賢否抑亦判
矣家鉉翁曰穀梁謂文不憂雨深得春秋垂訓
之旨汪氏克寬曰禮稱至于八月不雨則君不舉
今文公自十二月不雨至七月則陰陽之氣不和而
恒暘爲災者八越月矣文公漫不之省雖禪制未終
而屢行朝聘會盟祭祀之事其無恤民之心若是豈
可以居民上乎公羊謂不書旱不雨之日長而無災
范注亦云未爲災誤矣蓋旱爲災而不久則書旱早
爲災而久則書某月不雨至某月綱目於漢獻之世
書四月不雨至七月而分
注人相食則爲災可知矣

八月丁卯大事于大廟躋僖公

左傳

夏秋八月丁卯大事于大廟躋僖公逆祀也於是

大故鬼小先大後小順也躋聖賢明也明順禮也君

子以爲失禮禮無不順祀國之大事也而逆之可謂

禮乎子雖齊聖不先食父食久矣故禹不先鯀湯不先

契文武不先不窋宋祖帝乙鄭祖厲王猶上祖也是

以魯頌曰春秋匪解享祀不忒皇皇后帝皇祖后稷

君子曰禮謂其後稷親而先帝也詩曰問我諸姑遂

及伯姊君子曰禮謂其姊親而先姑也仲尼曰臧文

仲其不仁者三不知者三下展禽廢六關妾織蒲三

不仁也作虛器縱逆

祀祀爰居三不知也

公羊

大事者何大禘也大禘者何合祭也其合祭祭

何毀廟之主陳於太祖未毀廟之主皆升合食

於太祖五年而再殷祭躋者何升也

穀梁

陳大事者何大是事也著祫嘗祫祭者毀廟之主皆升合祭於太祖躋升

也先親而後祖也逆祀也君子不以親親害尊尊此春秋之義也

胡傳

有事者時祭大事祫也合羣廟之主食於大廟升僖於閔之上也閔僖二公親則兄弟分則君

臣以爲逆祀者兄弟之不先君臣禮也

集說

何氏休曰以言大與有事異又從僖八年禘數知爲大祫大祖周公之廟陳者陳列大祖前

大祖東鄉昭南鄉穆北鄉其餘孫從王父父曰昭子曰穆昭取其鄉明穆取其北面自外來曰升殷盛也謂三年祫五年禘禘所以異於祫者功臣皆祭也祫猶合也文公緣僖公於閔公爲庶兄置僖公於閔公上失先後之義故譏之范氏甯曰僖公雖長已爲臣矣閔公雖小已爲君矣臣不可以先君猶子不可

以先父故以昭穆父祖爲喻趙氏匡曰凡祭而失
禮則書祭名祭非失禮爲下事張本則稱事劉氏
敞曰大事者此其曰大事何也曰是乃諸侯之大事也諸
侯之事無大於此者矣裕之謂也奚以言之王者禘
禘其祖之所自出以其祖配之諸侯祫毀廟之主陳
乎大祖大夫子享或四廟或三廟或二廟庶人薦於
寢故曰德厚者流光德薄者流卑時祭稱有事裕祭
稱大事大之外無加者矣孫氏覺曰閔僖之爲君
臣較然於人一旦以臣而上君亂法之甚孫氏并
曰世與昭穆云者據父子之正而言也若兄弟則昭
穆同不得以世數之矣趙氏鵬飛曰兄弟一家之
私恩世統天下之大義僖之繼閔世統之正也安可
以私恩而亂世統哉聖人謹而志之以著其失垂萬
世之法也此柳下惠所以稱夏父弗忌爲不祥而仲
尼又以罪臧文仲爲不知禮歟家氏鉉翁曰三傳

明逆祀皆已得之但謂閔僖昭穆各自爲世不可不辨左傳曰子雖齊聖不先父食此言君臣猶父子非謂閔爲文祖也公羊乃云先禘後祖穀梁云無昭穆則無祖也杜預曰閔僖不得爲父子嘗爲臣位應下今居閔上逆也孔穎達發明杜意頗詳若兄弟各爲世柰昭穆之序斷不可行矣吳氏澂曰四時之祭稱祭名而曰烝曰嘗者五廟各祭也曰有事於大廟者四廟之主遷於大廟而合祭也是爲禘曰大事於大廟者毀廟之主亦與祭自伯禽以下禘廟以上之主皆合祭于大廟也是爲大禘程氏端學曰文公居喪未大祥而吉祭於大廟非禮一也僖公之主未嘗入宮非禮二也躋僖公於閔公之上非禮三也李氏廉曰古者戎祀皆國之大事季氏將有事於顓臾以兵事爲有事也天子有事於文武以祭祀爲有事也故春秋書大禘爲大事書禘祠烝嘗爲有事此年大事禘也宣八年有事禘也昭十五年有事烝也

此皆於祭無譏故不書祭名其郊禘大雩皆書祭名者祭之僭也烝嘗有書祭名者祭之失也此年大事之爲禘公穀皆同杜氏以爲禘者非也又案僖閔逆祀杜氏只以爲位次之逆不以爲昭穆之異胡氏辨世指父子之義恐未至汪氏克寬曰穀梁謂逆祀是無昭穆范甯曰以昭穆父祖爲喻何休謂惠公與莊公當同南面西上隱桓與閔僖亦當同北面西上孔穎達正義曰閔僖不得爲父子同爲穆爾今升僖先閔此二公位次之逆非昭穆亂也若兄弟相代即異昭穆設令兄弟四人皆立則祖父之廟即已從毀禮必不然今考文定此傳用韋昭說父爲昭子爲穆僖爲閔臣子一例而以閔僖各爲一世襄公三年謂哀公以襄公爲皇考亦以昭定各爲一世則是異昭穆矣然於仲嬰齊後歸父則引何休以爲亂昭穆之序竊疑古者一君各爲一廟則兄弟同昭穆共爲一世祫祭大廟則魯當以僖公特設位於閔公之下

後世同堂異室不可以二先君共祭於一室必至於
異昭穆而仍以兄弟共爲一世數之也然曾子問云
七廟五廟無虛主諸侯祫祭則祝逆四廟之主是諸
侯之昭穆無過四廟天子之昭穆無過六廟考之春
秋哀公之世桓宮猶在則是祭十君而八世定公立
煬宮則是祭二十一傳之祖後世天子之廟有十餘
世歷十四五君而其廟皆不毀說禮者反引
春秋以爲證而聖王經世之制不可復見矣

案兄弟昭穆廟制與五年再殷祭之說諸家之說紛
然不一皆不可以不辨祭統曰昭穆者所以別父子
遠近長幼親疎之序而無亂也周禮小宗伯辨廟祧
之昭穆鄭注曰自始祖之後父爲昭子爲穆賈疏曰
周以后稷廟爲始祖不密父爲昭鞠子爲穆從此以
後皆父爲昭子爲穆是故父子異昭穆兄弟昭穆同
弟必不可爲兄後子必不可爲父孫也小宗伯所爲
辨之者恐其父子兄弟之序之有亂而辨之也如三

傳及胡傳皆以閔僖爲父子則是以兄爲弟後以子爲父孫其亂昭穆之序也甚矣鄭氏謂商六廟自契至湯二昭二穆考之殷本紀陽甲盤庚小辛小乙兄弟四王如果兄弟異昭穆各爲一代則武丁之祭將不能上及祖乎晉賀循謂禮兄弟不相爲後不得以承代爲世又謂兄弟相代則共是一代昭穆位同不得兼毀二廟禮之常例也殷之盤庚不繼陽甲而上繼先君以弟不繼兄故也華恒謂兄弟苟及禮之變也宜爲神主立室不當以室限神主又謂廟當以容主爲限無拘常數又謂以七爲正不限之七室雖有兄弟旁及不越昭穆溫嶠謂兄弟同代於恩既順於義無否唐禮官謂兄弟不相爲後不得爲昭穆晉武帝時景文同廟廟雖六代其實七主至元帝明帝廟皆十室宋禮官亦謂兄弟繼統同爲一代魯隱桓繼及皆當穆位殷陽甲至小乙兄弟四人相承故不稱嗣子而稱及王明不繼兄之統也唐中睿皆處昭位

敬文武昭穆同爲一世伏請每大祭太祖太宗昭穆
同位祝文竝稱孝子又謂兄弟一體無父子之道父
爲昭子爲穆不刊之典也據此歷代禮官之議合之
何氏孔氏之言可以知四傳之爲謬矣汪氏克寬斟
酌情理可謂盡善故特錄之至所謂五年再殷祭者
漢儒每援此爲禘祫相因之說何氏鄭氏謂三年祫
五年禘徐邈謂相去各三十月三十月而祫三十月
而禘唐自睿宗而後五年一禘三年一祫各自計年
不相通數開元二十七年乃至禘祫竝在一歲宋熙
寧八年亦至既禘又祫竟無一定之論善哉乎楊氏
復之說曰夫殷祭乃大祫之祭也五年而再殷祭謂
三年一祫五年再祫也於禘祭乎何與可以一掃諸
家之紛紛
多端矣

冬晉人宋人陳人鄭人伐秦

左傳

冬晉先且居宋公子成陳轅選鄭公子歸生伐秦取汪及彭衙而還以報彭衙之役

胡傳

案左氏四國伐秦報彭衙之役則皆國卿也其貶而稱人者晉人再勝秦師在常情亦可以已

矣而復興此役結怨勤民是全不務德專欲力爭而報復之無已也以致濟河焚舟之師故特貶而稱人

集說

劉氏敞曰晉人宋人陳人鄭人伐秦左氏曰卿不書爲穆公故尊秦也非也於經何以知其非

微者稱人乎程子曰秦以憤取敗晉可以已矣而復伐秦報復無已殘民結怨故貶稱人高氏閌曰

三國以伐秦再舉兵而過京師尤其惡之大者陳氏傅良曰昌爲不序大夫將猶稱人也自士穀專盟

書大夫自陽處父專將書大夫是故春秋之始大夫將恒稱人由救鄭之後大夫始貶稱人矣李氏廉

曰此條左氏尊秦之義非經意其說如襄八年邢丘貶諸侯以尊晉相類胡氏說本程子其貶晉固是但

自入春秋以來至此除魯大夫帥師外外兵非君將者皆稱人如隱五年邾鄭伐宋桓十四年宋以四國伐鄭齊桓之霸伐宋伐鄭伐英氏晉襄以三國伐許與明年五國之伐沈皆未有書大夫名氏者則陳氏之考據不爲無見

公子遂如齊納幣

左傳

襄仲如齊納幣

公羊

納幣不書此何以書譏何譏爾譏喪娶也娶在三年之外則何譏乎喪娶三年之內不圖婚吉

禘于莊公譏然則曷爲不於祭焉譏三年之恩疾矣非虛加之也以人心爲皆有之以人心爲皆有之則曷爲獨於娶焉譏娶者大吉也非常吉也其爲吉者主於已以爲有人心焉者則宜於此焉變矣

胡傳

昏姻常事不書其書納幣者喪未終而圖昏也夫娶在三年之外矣則何譏乎春秋論事莫重

乎志志敬而節具與之知喪非虛加之也重志之謂也此

皆使人私欲不行
閑邪復禮之意

集說

董氏仲舒曰春秋譏文公以喪娶難者曰喪不

娶何以爲喪娶曰事莫重乎志納幣之月在喪內故

曰喪娶也且文公以秋祫祭以冬納幣皆失於太早

三年之喪肌膚之情也反在思念娶事春秋之所甚

疾也何氏休曰僖以十二月薨至此未滿二十五

月又禮先納采問名納吉乃納幣

四者皆在三年之內

范氏甯曰喪制未畢而納幣書非禮劉氏敞

曰左氏曰禮也則是喪娶爲禮不亦悖乎杜預遷

僖公薨月以就傳說然文公此年大事于大廟則已

欽定春秋傳說彙纂

二十三

自除喪矣彼尚能逆祀何故不能於此娶乎明此傳
誤無爲歸過於經而疑之也孫氏覺曰納幣之禮
婚姻之將成也文公於納幣之時而猶在喪制之月
春秋以其喪而謀婚故書以罪之也左氏之說范甯
非之當矣高氏閔曰婚禮有六曰納采曰問名曰
請吉曰納徵曰請期曰親迎自有次第納幣者即納
徵也公始祥而納幣則納采問名皆在三年之內矣
夫三年之內不圖婚聖人於此譏之所以闡幽也
汪氏克寬曰據春秋十二公皆不書納幣惟此年及
莊公親往則書之又曰喪雖二十五月大祥然中月
而禫必二十七月初始爲終制況春秋凡書四時皆指
首月此書冬則納幣在十月是僖公之薨甫及二十
三月殺哀而圖婚失禮甚矣宣公元年逆女其蔑禮
視此尤甚然其篡立之罪已極於喪娶乎何誅陳
氏際泰曰莊公不勝其母逾期納幣馬君子以爲已
緩矣文公不喪其父不及期納幣馬君子以爲已亟

矣

案左傳謂襄仲如齊納幣禮也凡君即位好舅甥修
昏姻娶元妃以奉粢盛孝也孝禮之始也此不待辨
而知謬者也人君即位自非始封皆有三年之服喪
而圖婚何禮之有杜注孔疏以長歷衍之謂喪服已
終又以納幣之前尚有納米問名納吉不能併行於
一月之內因謂公爲太子時已行昏禮皆曲附左氏
而遷就其說也

丁襄王二十八年

三年

晉襄四年齊昭九年衛成十一年蔡莊
二十二年鄭穆四年曹共二十九年陳

共八年杞桓十三年宋成十三
年秦穆三十六年楚穆二年

春王正月叔孫得臣會晉人宋人陳人衛人鄭人伐沈

沈潰

霸國大夫會諸大夫伐國自此始沈潰寧府汝陽縣

東南六十里有平輿故城沈亭在其地

左傳

三年春莊叔會諸侯之師伐沈以其服於楚也沈潰凡民逃其上曰潰在上曰逃

集說

孫氏覺曰沈者楚所與之國也諸侯不忍楚之暴於是伐其所與之國將以懼之沈小國不勝

而潰沈何罪乎春秋書之以諸侯爲失所伐矣劉氏絢曰一被侵伐而民散君之不能可知矣蔡潰沈

潰許潰是也王氏葆曰霸國大夫會諸大夫伐沈始會諸大夫救患自救鄭始春秋皆貶人之

不與大夫之專政也蓋舉兵伐人使之畏服所謂威也率衆救人使免於難所謂福也威福人主之利器

諸侯擅之則有害於天下大夫擅之則有害於國聖人見微知著故於此二役皆貶之所以戒威福之不

可下移也。高氏閔曰：魯使卿往，則諸國必非微者獨得臣書名氏者，詳內且明諸國皆卿行書人，以貶之也。文公三年之間，遂教得臣累見於經，則知魯政盡在諸臣矣。漢五行志：文公時，大夫始專政，信夫。胡氏銓曰：春秋侵伐之柄，下移於諸侯，自是遂移於大夫矣。趙氏鵬飛曰：內書得臣，則外亦大夫矣。外書人，則亦人內矣。晉襄紹霸，未嘗一出與諸侯為衣裳之會，而區區以大夫主之。吾於此知晉襄之不足與有為矣。襄公之霸，易於桓、文，桓制楚於方，張文敗楚於既，熾難乎為力，而襄公之世，商臣有滔天之惡，楚人棄之，此襄公之霸資也。而襄不能就，乃竭力於無事之秦，而以大夫主會卒之。大夫橫於內，諸侯受其弊，區區潰蕞爾之沈，以為能伐楚之與國也。嗚呼！臨矣，宜聖人之以示貶也。家氏鉉翁曰：楚商臣負滔天之罪，於今二年，使晉襄仗義而前天下諸侯孰不鼓勇而從者？晉之霸業有光於前矣，乃舍其大

而務其細以諸侯之兵伐沈而潰之避豺虎而獵狐兔雖潰百沈何益乎故春秋貶人之

案伐沈之役五國皆稱人先儒之說以爲威福下移而政在大夫者高氏閔胡氏銓也以爲諸侯失所伐而晉襄舍大務細不足有爲者孫氏覺家氏鉉翁趙氏鵬飛也蓋皆以書人爲貶也胡傳謂雖非義舉而與報復私怨者有間故其辭無褒貶恐非經旨今故不錄

附錄左傳

衛侯如陳拜晉成也

夏五月王子虎卒

左傳

夏四月乙亥王叔文公卒來赴弔如同盟

胡傳

王子虎不書爵譏之也天子內臣無外交

集說

杜氏預曰不書爵者天王赴也翟泉之盟雖輒假王命周王因以同盟之例爲赴孔氏穎達

曰王子虎即王叔文公也謚之爲文必當有爵不書爵者畿內之國不得外交諸侯其臣不敢赴魯必天

子爲之赴赴以王子爲親不復言其爵也啖氏助曰穀梁云叔服也叔服若是王子則會葬之時何不

書王子乎趙氏匡曰臣無外交之禮今死而赴故書以譏又曰左氏云弔如同盟禮也案天子大夫無

與諸侯盟之禮而曰禮也豈春秋之意乎孫氏復曰外大夫來赴非禮也劉氏敞曰王子虎者何天

子之大夫也外大夫不卒此何以卒或曰爲其當臨諸侯之盟也高氏閌曰赴於諸侯而書其卒蓋著

其交政於諸侯也陳氏傅良曰公穀以爲叔服非是李氏廉曰左氏注王子虎太宰文公王卿士也

內史叔服王之大也後十四年星孛之變又載叔服之言則分明兩人矣啖子陳氏亦以公穀爲非不

知胡氏何据且胡氏於星孛之下又引叔服之言則亦不以左氏爲非矣不知何不照應如此汪氏克寬曰或者謂虎與卷皆夾輔天子於艱難危困之中故春秋賢而卒之然單穆公旗與劉文公翼贊敬王以安周室亦不書卒竊疑王子虎盟諸侯於王庭劉文公爲王官伯尹氏世執朝權皆王室之秉政者故特赴於諸侯而魯史記其卒春秋存而弗削以示王臣不當赴喪於列國耳

秦人伐晉

左傳

秦伯伐晉濟河焚舟取王官及郄晉人不出遂自茅津濟封穀尸而還遂霸西戎用孟明也君

子是以知秦穆公之爲君也舉人之周也與人之壹也孟明之臣也其不解也能懼思也子桑之忠也其知人也能舉善也詩曰于以采蘩于沼于沚于以用之公侯之事秦穆有焉夙夜匪解以事一人孟明有

馬詒厥孫謀以燕
翼子子桑有焉

王官杜注晉地今山西平陽府臨晉縣東南七十里王官谷有廢壘即王官城也 郊杜注晉地史

記取王官及鄆正義曰鄆音郊當爲臨晉平陽間小邑 茅津杜注在河東大陽縣西今山西平陽

府平陸縣南有大陽渡即春秋茅津也有古茅城南對陝州

胡傳

案左氏秦伯伐晉濟河焚舟封穀尸而還其稱人何也聖人作易以懲忿窒慾爲損卦之象其

辭曰損德之修也春秋諸侯之知德者鮮矣穆公初聽杞子之請違蹇叔之言其名爲貪兵是慾而不能

窒也及敗於穀歸作秦誓庶幾能改將室其慾矣復起彭衙之師報穀函之役其名爲忿兵是忿而不能

懲也今又濟河取郊人之稱斯師也何義哉晉人畏秦而不出穆公逞其忿而後悔自是見伐不報始能

踐自誓之言矣是故於此貶而稱人備責之也

集說

程子曰構怨連禍殘民以逞晉人畏之而不敢出秦人極其忿而後悔過聖人取其終能悔耳

陳氏傅良曰此秦伯也曷爲貶稱人殺之誓孔子有取焉而秦穆之連兵無虛歲故自韓原秦不以爵見於經張氏洽曰穆公既歸自穀而作秦誓矣然彭衙及此役猶以報復爲事豈非悔過之心不能勝其恥敗之心而至此乎趙氏鵬飛曰秦穆公伐晉以報前日三敗之辱也而說者以穆公之霸在此齊桓晉文之霸聖人必有褒大之辭雖宋襄之無成春秋於曹南之盟亦必書爵以揭於諸侯之上今秦於穀之戰彭衙之役皆書師而於此乃書人豈謂其霸而反人之耶孟子之所謂五霸者其實桓文而已宋襄之敗固所不錄而秦穆楚莊皆無子辭鄙秦楚也今秦人伐晉實忿兵矣前日之敗兵端皆啟於秦彼

君子歟固亦懲忿窒慾爾且三敗豈晉敗之秦實伐人實自敗爾論者徒見其殺之敗有悔咎之誓孔子列於周書遂以爲聖人予秦穆今自殺之敗兵連禍結以戕其民安在其爲悔也聖人特取誓之文而已非謂進秦穆也今焚舟之勝雖霸西戎春秋書曰人其貶可知矣鄭氏玉曰夫子於秦穆錄其悔過之辭於書以爲法著其窮兵之禍於春秋以爲戒猶化工之於物生殺並行而不相悖也李氏廉曰左氏以此役爲秦伯西戎之始且稱其舉人之周與人之壹孟明之不解子桑之知人而胡氏諸說皆以爲貶者左氏得其事胡氏論其義也汪氏克寬曰穆公自誓之言追咎既往之失冀將來之善不貴勇夫而貴良士惡媚疾而思彥聖期以保邦爲念諄諄懇惻誠可爲有天下國家者之法則夫子取之以繼四代之書而門人引之以釋大學平天下章亦可謂善言矣胡乃不踐其言終用孟明報復至再必以勝晉而

後已故書取其言而春秋責其事也說春秋者因左傳有霸西戎之一語而史記謬稱穆公益國十二開地千里天子使召公賀以金鼓然考傳之所記則踰二年而穆公卒其謂楚舟伐晉而遂霸者已非事實況證以經之書法自戰韓稱爵其後終穆公之身並以人書穀之役且以號舉反不若楚莊之見於經並紀其爵則許穆公以霸者妄矣

秋楚人圍江

左傳

楚師圍江晉先僕伐楚以救江

集說

高氏閑曰江近楚自貫澤之盟已服從於齊桓而楚自城濮之後亦不敢侵伐今復圍者蓋晉

文既沒襄公不能討楚人弑逆之惡故楚復有窺諸侯之意而先圍江以試之也吳氏澂曰自齊桓之

霸江黃以近楚之國而從齊故楚憾之之深前既滅黃矣而未加兵於江者蓋江猶能守其國也故至今年有圍江之師李氏廉曰經書人以圍國者十一圍非將卑師少所能辨皆貶辭也黃氏正憲曰晉襄嗣位霸業始衰楚人已有侮心矣近又與秦爲敵無暇圖楚商臣遂發兵圍江以威江淮間小國非專報伐沉之役也

雨蝨于宋

左傳

秋雨蝨于宋

公羊

何以書記異也外異不書此何以書爲王者之後記異也

穀梁

外災不志此何以志也曰災甚也其甚奈何茅茨盡矣著於上見於下謂之雨

集說

杜氏預曰自上而墮有似於雨來告故書。孫氏覺曰雨自上而下者也。蠡不見其所從來自

上而下衆多如雨而在宋之四境故曰雨蠡于宋也。黃氏仲炎曰春秋書外國之災有因弔問而知之者有聞而知之者宋大水公使弔焉是因弔問而知之者也。六鷁退飛隕石雨蠡之類非弔問也特聞而知之爾。趙氏鵬飛曰蠡生於下今雨於上異之大者也。此所謂天降之災外災不書此何以書赴於我也。或以爲死而隆安知其爲死吾欲聞之。程氏端學曰蠡生則害五穀況如雨之多害物甚矣。災異極矣。王氏樵曰蠡非上隊之物來多而隊故書雨見災甚耳。既爲災則非隊而死也。左氏因雨字而生說耳。徐邈云禾稼既盡又食屋之茅茨。驗嘗有之。

冬公如晉十有二月己巳公及晉侯盟

此書公如晉之始

左傳

晉人懼其無禮於公也請改盟公如晉及晉侯盟晉侯饗公賦菁菁者莪莊叔以公降拜曰小

國受命於大國敢不愼儀君貺之以大禮何樂如之抑小國之樂大國之惠也晉侯降辭登成拜公賦嘉樂

集說

高氏閌曰公之如晉蓋朝也非爲盟也晉人於是請改盟夫盟已定矣又何改爲公宜固辭乃

復與盟皆非禮也

張氏洽曰不書地盟於晉都也

趙氏

鵬飛曰魯能屈而事大國不憚於親朝以雪

教之抗晉能有忍不遽以干戈相向一盟而釋忿猶爲知自反者也故聖人直文無諱非若二年及處父

盟沒公以見耻處父去族以示貶者矣李氏廉曰文公再如晉矣二年以見辱不書故此爲書公如晉

之始汪氏克寬曰前此未有因朝聘而盟於國都者諸侯有不協之故則期會於某地而牲餼以示信

已非盛世之事況因其朝聘而要之哉前年朝晉晉既以處父盟公於其國此年雖云改盟而猶要公之朝以約誓於國都甚矣文公之屈辱也晉襄苟懼其無禮曷不爲會於晉魯之間以相盟乎厥後荀庚孫良夫卻犂孫林父向戌且因聘魯而要盟矣又其甚則杞子以三恪之君亦即魯而歆盟焉始也魯君盟於霸國終也諸侯盟於魯世變可知矣

晉陽處父帥師伐楚以救江公穀無以字

左傳

冬晉以江故告於周王叔桓公晉陽處父伐楚以救江門於方城遇息公子朱而還

公羊

此伐楚也其言救江何爲其爲譏奈何伐楚爲救江也也

穀梁

此伐楚其言救江何也江遠楚近伐楚所以救江也

胡傳

以者不以者也救江善矣其書以何楚嘗伐鄭矣齊桓公遠結江黃合九國之師於名陵然後

伐鄭之謀罷又嘗圍宋矣晉文公許復曹衛會四國之師於城濮然後圍宋之役解今江國小而弱非能與宋鄭比楚人圍之必不待徹四境屯戍守禦之衆與宿衛盡行也當是時楚有覆載不容之罪晉主夏盟宜合諸侯聲罪致討乃獨遣一軍遠攻強國豈能濟乎故書伐楚以救江言救江雖善而所以救之者非其道矣此春秋紀用兵之法也

集說

孫氏復曰先言伐楚而後言以救江者惡不能救江也楚人圍江陽處父帥師不急赴之乃先

伐楚欲其引兵自救而江圍解非救患之師也故明年秋楚人滅江陳氏傅良曰晉大夫書帥師於是始大夫強也張氏洽曰楚商臣無父無君乃致患於江是禽獸逼人之甚晉襄不能率諸侯乘此時誅

之此春秋特書以正其不能奉天討之罪也 呂氏
大圭曰春秋之初有以大夫帥師者矣未有若陽處
父之專伐也內大夫帥師而不氏者則無駭帥師入
極溺會齊師伐衛是也內大夫帥師而氏者公子慶
父帥師伐於餘丘公孫茲帥師會侵陳是也而外大
夫則未有帥師而出主名者若陽處父則帥師而出
主名矣以見征伐之自大夫出也 吳氏澂曰江受
楚之伐霸者所當救也處父畏楚兵之強不敢徑趨
江之城下乃揚言伐楚以救江門於方城一見息公
之來即避之而返既不能救江又不能伐楚其畏怯
也明矣 汪氏克寬曰春秋書侵伐多不言所事而
此書伐以救實爲特筆考於傳之所錄非惟楚侵陳
以救鄭伐鄭以救齊不書雖齊桓伐厲以救徐亦止
書伐厲而不書以救也豈非責處父既不能伐楚又
不能救江而特起伐以救之文以罪之歟經書加兵
於楚者三惟齊桓聲包茅不貢之罪而得屈完之服

處父有伐楚之名而無討楚之實晉定公會十八國
於召陵有伐楚之勢而僅爲侵楚之陋春秋蓋惜之
也王氏樵曰襄公實無制楚憂諸夏之誠心故僅
遣偏師以塞責胡傳乃議其宜合諸侯以秦甲出武
關以齊兵略陳蔡而南是時秦方爲怨耦豈所能
合然使襄公有真志而務其實則亦無賴於秦也
案楚滅弦滅黃齊未嘗遣一旅之師至是圍江而晉
人勤之既遣先僕於前又請王師於後命上卿動大
衆聲罪而致討焉非徒以孤軍塞責也且傳稱門於
方城遇息公子朱而還注謂子朱爲楚伐江之師聞
晉師起而江兵解故晉亦還是處父亦未嘗無功矣
三年秋書圍四年秋書滅蓋江近於楚晉師既還楚
師復出遂致滅耳故晉之罪在於不能存江而伐楚
以救江則未見其罪也胡傳行世已久先儒多從之
今仍其說而
附見此義云

戊戌 襄王二十四年 晉襄五年 齊昭十年 衛成十二年 蔡莊
十九年 四年 二十三年 鄭穆五年 曹共三十年 陳共

九年 杞桓十四年 宋成十四年 秦穆三十七年 楚穆三年

春公至自晉

集說

孫氏復曰自是公朝彊國皆至者惡其輕去宗廟遠朝彊國也 孫氏覺曰文公之出六致之

者四危之也不致者二安之也 汪氏克寬曰自是

公如皆致如晉者凡二十書至者十有三皆所以著

其去國踰時之久或執或辱故危之也始也文公如

晉則有處父要盟之恥而不書至迄其終也昭定六

如晉而不見納書至河乃復焉又不若書至之爲愈
矣人君舉動之得失可不慎哉據事直書而義自見
類謂此也

附錄左傳

四年春晉人歸孔達於衛以爲衛之良也故免之夏衛侯如晉拜曹伯如晉會

正

夏逆婦姜于齊

穀梁

其曰婦姜爲其禮成乎齊也其逆者誰也親逆而稱婦或者公與何其速婦之也曰公也其不

言公何也非成禮于齊也曰婦有姑之辭也其不言氏何也貶之也何爲貶之也夫人與有貶也其不

胡傳

逆皆稱女以未成婦而女者在父母家之所稱也往逆而稱婦入國不書至何哉此春秋誅意

之效也禪制未終思念娶事是不志哀而居約矣方逆也而已成爲婦未至也而如在國中原其意而誅之也不稱夫人姜氏者亦與有貶焉婦人不專行何以與有貶父母與有罪也文公不知敬其伉儷違禮

而行使國亂子弑齊人不能鑒微知著冒禮而往使其女不允於魯皆失於不正其始之過也夫婦之際人倫之首禮不可不謹也故交貶之以爲後鑒

集說

范氏甯曰婦禮成於齊故在齊便稱婦楊氏士勛曰公羊傳曰其謂之逆婦姜于齊何娶於

大夫者略之也徐邈亦以爲不書至不稱夫人下娶賤略之若以諸侯下娶大夫便爲賤則大夫亦不得上娶諸侯且天子得下婚諸侯何爲諸侯不得下娶大夫是公羊之言不可以解此也蓋不稱夫人不言至者以其婦禮成於齊故異於餘稱傳曰夫人與有貶也者解不稱氏之意非釋不稱夫人也趙氏匡曰公自逆常事不書以成禮于齊所以變文云逆婦以譏之孫氏復曰此公逆婦姜于齊也不言公者諱之也不言逆女者以其成禮于齊也以其成禮于齊故不言公以諱之劉氏敞曰逆婦姜于齊正

始之道也待之不以夫人之禮故夫人不以其位終
國亂子弑疆臣擅命幾於亡矣夫丈夫公非不欲存妻
子傳世者也閹弱情慢不能率禮而行以爲苟若而
可何禮之守故卒至於禍也夫婦之際人倫之首可
不慎哉故鑒末以原本因微以知著又非獨文公之
罪也雖夫人預有罪矣當是之時夫人冒大禮以往
遂無所據依以危其身而亡其子由本不正故也殆
而呼天不亦晚乎吾以此觀之禮之於人大矣是存
則存是亡則亡文公之不能保其後嗣者由無以刑
其妻也夫人之不能安其位者由無以謹於禮也此
正始之道也又曰公羊曰娶乎大夫略之也此雖孤
經無他證據然魯初納幣乃用上卿審娶大夫者禮
豈如此崇乎程子曰納幣在喪中與喪昏同也稱
婦姜已成婦也不稱夫人不可爲小君奉宗廟也
張氏洽曰聖人嚴吉凶之辨蓋人之所以異於禽獸
者正以有父子之親而三年之喪哀戚之至也國君

爲風教之首而納幣於喪中春秋變逆女爲逆婦姜
不成其夫人之禮以見人倫之本已失何以正是國
人爲後嗣之基乎家氏鉉翁曰三傳不同穀梁之
義爲正公羊娶乎大夫恐未然汪氏克寬曰春秋
一經書逆夫人惟此年最略既不書逆者名氏又不
書如齊不稱夫人不言氏不書至豈非聖人責文公
首柩通喪之禮而然歟宣公之娶尤亟而書法加詳
事同而既貶則從同也陳氏際泰曰文姜不與
桓偕入抗也哀姜不可見乎宗廟仇也出姜若已成
爲婦怠也女壯者或弑其夫或弑其子女弱者至不
保其子與
不允其身

棄納幣卿行則逆婦必非微者蓋文公自行也聖人
惡其成禮於齊故沒公不書以示貶穀梁得之而左
氏非也公羊以爲娶於大夫則失之遠矣逆婦雖在
免喪之後而納幣則在喪中先儒譏喪娶亦可兼用

蓋圖昏於憂服而成禮於婦家所謂失禮之中又失禮也

狄侵齊

集說

王氏葆曰大國如齊狄侵者四則其他邢衛魯鄭不足怪也趙氏鵬飛曰僖三十二年狄犯

晉晉人敗之故其後狄不敢干晉之怒狄侵齊而齊不討故至是復侵齊汪氏克寬曰狄自箕之敗至是始復侵齊以晉襄無攘却之謀而齊伯不紹故也

狄楚人滅江

左傳

楚人滅江秦伯爲之降服出次不舉過數大夫諫公曰同盟滅雖不能救敢不矜乎吾自懼也

君子曰詩云惟彼二國其政不獲惟此四國爰究爰度其秦穆之謂矣

集說

高氏開曰江終爲楚所滅則知楚之復彊而處父之帥師無益於救張氏洽曰江之不祀晉

襄之無遠謀也趙氏鵬飛曰江之滅晉之恥而處

父之罪也晉不能服楚則何以底江無以底江則安

保其無滅方江受楚圍使處父帥師直赴於江江關

楚於前處父掎之於後楚兵未必不敗而奔也乃以

區區之師伐楚欲楚兵釋江以自救宜其不能撼楚

而致江之滅也江君不書奔死社稷也江之圍於是

蓋期歲矣期歲必不下則江君之賢否抑亦可見歟

滅不見執不書奔則江雖滅其君之義固存也吳

氏澂曰三年之秋楚人圍江晉人陽爲救之之名而

無救之之實江之受圍周一期而其國竟滅晉霸不

競而荆楚得以肆其虐於小國可哀也夫汪氏克

寬曰公羊云入不言圍書其重者黃書伐而江書圍

著齊晉之不能救也滅者亡國之善辭上下之同力

江黃之君不書奔不書以歸則能固守待援而死於

其位又可知矣

晉侯伐秦

左傳

秋晉侯伐秦圍祁新城以報王官之役

祁杜注秦邑當在今澄城縣境新城杜注秦邑今陝西西安府澄城縣東北二十里有古新城地名攷曰即梁國之新里也

集說

程子曰秦逞忿以伐晉晉畏而避之其見報乃常情也秦至此能悔過矣故不復報晉聖人取

其能遷善也稱晉侯不復加譏見秦宜得報而自悔不復修怨乃其善也朱子曰謂書晉侯而以常情待晉襄書秦人而以王事責秦穆恐未必如此程子所謂微辭隱義未易言也張氏洽曰晉襄以王官

之役不報爲恥未若商臣之得志於江爲恥之大也
報秦而不誅商臣使亂臣賊子得以夷滅小弱逞其
山毒晉襄之爲盟主末矣比事書之深罪晉侯不以
江亡爲恥而敵秦怨也趙氏鵬飛曰三年秦人伐
晉雖報三敗之辱其實非義舉也三敗秦自敗何報
之有秦報之非似晉報之爲是矣雖然聖人豈欲人
之興戎交怨而不釋哉實均罪人也然曲直施報之
文不辨則無以寓夫褒貶故於秦書人而晉書侯其
曲直是非之理判矣李氏廉曰秦
穆晉襄五年之間交兵者五止此

案伐秦之役經書晉侯張氏洽以爲深罪襄公者是
也自戰穀以來晉屢勝秦及秦伯濟河焚舟而晉避
不出兩國勝負亦相當矣今又伐秦是日尋干戈以
相讎也況救江則遣大夫伐秦則君親之故書晉侯
伐秦於滅江之下以見其急於修怨而緩於恤患也
趙氏鵬飛以晉報爲是蓋以秦晉交兵釁起自秦故

晉無譏爾其說亦通胡氏安國謂春秋以常情待晉襄以王事責秦穆不責晉侯者正所以深善秦伯則朱子亦疑其說矣今故不錄

衛侯使甯俞來聘

左傳

衛甯武子來聘公與之宴爲賦湛露及彤弓不辭又不荅賦使行人私焉對曰臣以爲肄業及

之也昔諸侯朝正於王王宴樂之於是乎賦湛露則天子當陽諸侯用命也諸侯敵王所愾而獻其功王於是乎賜之彤弓一彤矢百旅弓矢千以覺報宴今陪臣來繼舊好君辱貺之其敢干大禮以自取戾

集說

趙氏鵬飛曰禮諸侯歲相問也殷相聘也殷衆也殷見曰同十有二年五服盡朝故曰殷見殷

見既畢諸侯更遣大夫以交聘於鄰邦是之謂殷相聘今殷見則亡而殷聘則存所亡者在周而所存者

在諸侯則知諸侯疆而周室微矣子太叔曰文襄之
霸也其務不煩令諸侯三歲一聘五歲一朝則三歲
之聘本於文襄今襄公未沒諸侯其敢違之則甯俞
之聘霸主令也霸主之令則然矣周公之典安在哉
此聖人書之以傷周道也 吳氏澂曰案左氏所載
晉文公之季年諸侯朝晉衛成公獨不朝又使孔達
侵鄭伐繇訾及匡晉襄公既祥使告於諸侯而伐衛
圍戚取之衛不服罪而孔達敢伐伯主其明年晉會
諸侯于垂隴將伐衛幸得陳侯爲之請成執孔達以
說于晉而衛遂得免於晉伐自孔達遭執之後蓋甯
俞代之爲政至次年春衛從晉伐沈自此衛服伯主
而無事矣至次年春晉遂歸孔達其夏衛侯朝晉至
秋而來聘魯焉事大睦鄰以安社稷或者皆
出甯俞之謀也夫子稱其知可及者蓋如此

冬十有一月壬寅夫人風氏薨

左傳

冬成風薨

胡傳

風氏僖公之母莊公妾也而稱夫人自是嫡妾

異邦曰寡小君蓋敵體之稱也若夫妾媵則非敵矣其生亦以夫人之名稱號之其卒亦以夫人之禮卒葬之非所以正其分也以妾媵爲夫人徒欲尊寵其所愛而不虞卑其身以妾母爲夫人徒欲崇貴其所生而不虞賤其父卑其身則失位賤其父則無本越禮至是不亦悖乎夫禮庶子爲君爲其母無服不敢貳尊者也春秋於成風記其卒葬各以實書不爲異辭者謹禮之所由變也

集說

陸氏淳曰啖子曰自成風之後妾母皆僭用夫人之禮程子曰自成風以後妾母稱夫人嫡

妾亂矣仲子始僭尚未敢同嫡也蘇氏轍曰僖公之妾母也凡魯君之妾母其生也稱夫人其沒皆以

夫人之禮成之而天子諸侯亦以夫人之禮禮之考
之舊典則非禮也然春秋書之不爲異詞者君臣之
禮也朱子曰僖公成風與晉簡文帝鄭太后一也
皆所以著妾母之義陳氏傅良曰夫人某氏嫡稱
也喪之以夫人之禮也隱公之喪桓母猶有疑焉是
故別廟也耐姑稱謚伉然如夫人則自文公之喪成
風始薛氏季宣曰妾母爲夫人僭也僭則何以取
乎春秋不沒其實也黃氏仲炎曰惠公仲子而不
稱夫人是當時猶不以夫人稱之也今以夫人稱成
風則已甚矣或曰子爲君而不得尊其母可乎曰爲
人子以所當得者加於其親而親安之則孝在是矣
苟以其所不當得者加於其親使其親無以安之可
謂孝乎齊氏履謙曰哀姜以罪誅死雖還其喪而
葬之於誼不可以入宗廟故僖公緣此誼尊成風爲
夫人以妾亂嫡非所以正名分尊君父也至其後世
宣母敬嬴襄母定姒昭母齊歸哀母弋氏皆援例以

立夫禮自成風始也春秋惟弋氏文獨異說者以爲哀未逾年餘並同夫人書之不沒其實而已陳氏際泰曰歸仲子之贈考仲子之宮已有夫人之實特未被以夫人之名爾踵事增華變本加厲又何怪焉禮之失也自成風昉也成風之爲夫人也自仲子昉也

已襄王三

五年

晉襄六年齊昭十一年衛成十三年蔡莊二十四年鄭穆六年曹共三十一年

陳共十年杞桓十五年宋成十五年秦穆三十八年楚穆四年

春王正月王使榮叔歸舍且贈

暗舍戶反

公羊

舍者何口實也其言歸舍且贈何兼之也

穀梁

舍一事也贈一事也其曰且志兼也

胡傳

珠玉曰含車馬曰賸歸含且賸者厚禮妾母也

其名號者所履則天位也所治則天職也所敕而惇之者則天之所叙也所自而庸之者則天之所秩也所賞所刑者則天之所命而天之所討也夫婦人倫之本王法所尤謹者今成風以妾僭嫡王不能正又使大夫歸含賸馬而成之爲夫人則王法廢人倫亂矣是謂弗克若天而悖其道非小失爾故特不稱天以謹之也

集說

杜氏預曰珠玉曰含含口實車馬曰賸成風莊公之妾天子以夫人禮賸之范氏甯曰榮叔

天子之上大夫也榮采也叔字孔氏穎達曰公羊傳曰兼之非禮也賈服云含賸當異人今一人兼兩使故書且以譏之案禮雜記諸侯相弔之禮含槨賸臨同日而畢與介代有事焉不言遣異使也言且者

見有二禮而已。宰咺言來歸，此不言來者，穀梁傳曰：其不言來者，不周事之用也。贈以早而含以晚，其意以爲含者所以實口，當及未殯而至，以其至晚，故不言來以責王也。案雜記：含者執璧將命，坐委於殯。東南有葦席，既葬，蒲席然，則含綖者所以助喪盡恩，示其有禮而已。旣葬，猶尚致之，不必以濟其用。天子之與鄰國，莫不道路長遠，赴者猶尚不至，責其未殯而來，此是禮之不通也。且來者自外，之文非是。襄貶之意，宰咺言來，豈周事之用者乎？趙氏匡曰：公穀皆云兼之，非禮也。據禮，含贈綖止一人兼行，爾若每事須一人，則釐王朝之臣不足以克喪禮之使也。劉氏敞曰：王使榮叔歸含，且贈，不知者乃以謂天子贈人之妾小過，爾而譏之，深求車殺母弟大惡也。而譏之略是，不及知春秋正人倫之意也。君臣也，父子也，夫婦也，治之三綱也。道莫先焉。桓以臣弑君而王命之成風以妾僭嫡，而王成之於三綱廢矣，是失人之

所以爲人也王之無天不亦明乎程子曰天子成
妾母爲夫人亂倫之甚失天理矣不稱天義已明稱
叔存禮也陳氏傳良曰昭常事不書惟昭仲子成
風特書之則遂命爲夫人也春秋之初猶以爲非常
事也宣之敬嬴襄之定如昭之齊歸雖命爲夫人不
復書矣孟子卒不赴於京師孔子曰夫人之不命於
天子自昭公始也汪氏克寬曰禮經天子諸侯於
妾無服而周官職喪掌諸侯之喪及卿大夫士凡有
爵者之喪亦不及邦國夫人之喪也今王臣舍昭則
是魯以成風之喪赴於京師矣夫人之喪猶不當赴
於王况妾母乎王之賜以含賸其責已深而魯之往
赴其罪亦不可揜春秋王禮之施於魯者惟桓文二
公爲數且盛而秦瀆三
綱有如此者亦可悲夫
案魯弑君始桓僭嫡始成風王不能正而又成之故
錫命歸含賸會葬王皆不稱天以謹其始僭嫡不謹

之於仲子者仲子不稱夫人又別立宮未全乎僭故
於其歸賁也名宰而已或疑王不稱天爲闕文則榮
叔歸含賁偶一闕焉可
也不應召伯會葬又闕

三月辛亥葬我小君成風

公羊

成風者何僖公之母也

胡傳

仲子雖聘非惠公之嫡也春秋之初尚以爲疑故別爲立宮而羽數特異此雖非禮之正然不

附於姑猶有辨焉至是成風書葬乃有二夫人附廟而亂倫易紀無復辨矣故禮之失自成風始也

集說

何氏休曰風氏也任宿顯史之姓孫氏復曰成謚也程氏端學曰小君者嫡夫人之稱而

妾母稱之又私謚焉亂禮甚矣汪氏克寬曰後世以妾母爲正嫡至於襄事乃黜正嫡而嬖妾合葬焉

如中宗之葬乾陵嚴善思諫而弗止循襲而莫知其失矣孰有如漢之孝文自謂側室之子而不以爲嫌乎者

王使召伯來會葬

召穀作毛

左傳

名昭公來會葬

穀梁

會葬之禮於鄙上

胡傳

王臣下聘桓公冢宰書名示貶而大夫再聘則無譏焉或以爲從同同也或以爲同則書重也

成風薨王使榮叔歸含且賸既不稱天矣及使召伯來會葬又與貶焉何也歸含且賸施於妾母已稠疊矣又使卿來會葬恩數有加焉是將祔之於廟也而致禮於成風盡矣聘一也含賸而又葬則其事益隆

亂人倫廢王法甚矣再不稱天者
聖人於此尤謹其戒而不敢略也

集說

杜氏預曰召伯天子卿也召采地伯爵范氏甯曰從竟至墓主爲送葬來劉氏敞曰左氏

曰禮也非也禮庶子爲君爲其母無服不敢貳尊者
也妾母稱夫人王不能正而又使公卿會葬何禮之

有杜氏諤曰薨而賄舍尚曰不可况又使卿會葬
乎故復去天以示義程子曰天子以妾母同嫡亂

天理也故不稱天聖人於此尤謹其戒蘇氏轍曰
諸侯必有使來會葬者矣以微故不錄王人雖微必

書石尚歸脤是也而況召伯乎陳氏傳良曰王不
稱天於追錫桓公見之至是再見以夫人之禮喪成

風也莊僖之際天下知有盟主而已而襄王之季年
更有事於諸侯於是叔服會葬毛伯錫命尤汲汲於

魯也尤汲汲於魯而何爲乎成風一人賄舍之一人
葬之以是懷諸侯吾見周之益陵夷矣牢咥嘗以賄

妾母貶則召伯何以不貶王公一體也宰書名則王
不待貶而自見王不稱天則召伯不待貶而自見也
桓以少篡長成風以庶亂嫡王道熄矣而莊襄不能
正又從而褒賞之是以天命施之天討也故皆不稱
天家氏鉉翁曰天子之於諸侯有會葬之禮非所
以施之妾母也元年書叔服此年書召伯五年之間
後先兩會葬或稱天王或王不稱天比事而觀著義
豈不甚明乎汪氏克寬曰春秋君夫人葬惟僖公
及成風王使大夫來會湛氏若水曰會葬之禮諸
侯所以尊天子天子答施於諸侯猶之可也而施於
妾母是成其夫人而教人以妾僭嫡矣秦名分逆天
理莫此之甚者也故春秋既書王使榮叔歸含且賵
又書王使召伯來會葬則王之不王其過自不可掩矣

夏公孫叔敖如晉

集說

高氏閌曰王舍且賄又來會葬矣捨天王而謹事晉不待貶而惡見也吳氏澂曰三年之冬

公朝晉今又使卿往聘焉魯之謹於事霸主也魯臣如晉聘者二十四致綏會葬者又四焉始於公子遂而終於季孫斯仲孫何忌或疎或數或無所爲或有所爲考其時與事而得失見矣

秦人入郿

若郿音

左傳

初郿叛楚即秦又貳於楚夏秦人入郿

集說

高氏閌曰郿蓋微國秦以其叛而入之後遂爲楚所并楚昭王復國之後畏吳之彊去郿而都

郿矣

趙氏鵬飛曰穆公之霸西戎以威勝而已無德以懷之故不足以宗諸侯也楚商臣不君郿叛楚

而即秦以穆之霸爲足恃也及楚滅江則郿懼而貳於楚秦不能以德柔之而稱兵入郿彼區區小邦一

舉可滅矣而穆公亦念所以致郛之貳於楚者誰也
秦誓曰責人斯無難惟受責俾如流吾見徒能言之
矣家氏鉉翁曰齊桓滅遂降鄣晉文請隧弗許則
受田至以兵取之秦穆滅滑入郛是三君者天理人
欲往來於方寸之間所以僅能爲霸君子羞稱焉
季氏本曰秦自入滑以窺東諸侯而不得至是入郛
以窺楚也非晉迫其東
則其肆行豈在楚下哉

秋楚人滅六

六杜注六國廬江六縣今在江南廬州府六安州北

左傳

六人叛楚即東夷秋楚成大心仲歸帥師滅六冬楚公子變滅蓼臧文仲聞六與蓼滅曰皋陶

庭堅不祀忽諸德之不建民之無援哀哉

蓼杜注蓼國安豐蓼縣今河南汝寧府固始縣東北蓼城岡其地即古蓼國漢蓼縣

集說

高氏閼曰楚人滅江滅六敢肆其惡逆如此者以列國不正其弑逆之罪故也呂氏祖謙曰

邾滅須句楚滅六蓼夫須句司大皞之祀六蓼實皋陶之後此皆先王所封諸侯唐虞三代綿延不廢何故纔入春秋之世便見屠戮蓋向時間有聖賢之君相與維持故得世守其國祀至此先王德澤既斬故先王之諸侯亦不能自存此最見得天下大勢家氏鉉翁曰武王訪帝王聖賢之後紹其封盛德事也周網陵遲先代之後蠶食無餘若滅蓼滅六滅蓼之類是也吳氏澂曰晉襄公死期將及故其志氣不能如初年之盛紹霸之業浸以衰微故秦楚敢於肆行吞噬弱小而無所忌也

冬十月甲申許男業卒

集說

林氏堯叟曰僖公卒昭公錫我立

附錄左傳

晉陽處父聘於衛反過甯甯嬴從之及溫而還其妻問之嬴曰以剛商書曰沈漸剛

克高明柔克夫子壹之其不沒乎天爲剛德猶不干時况在人乎且華而不實怨之所聚也犯而聚怨不

可以定身余懼不獲其利而離其難是以去之晉趙成子欒貞子霍伯白季皆卒

甯杜注晉邑汲郡修武縣今河南衛輝府獲嘉縣西北有修武故城古甯邑秦置縣

庚襄王三
子十一年
六年
晉襄七年齊昭十二年衛成十四年蔡

陳共十一年杞桓十六年宋成十六年秦穆三十九年楚穆五年

春葬許僖公

集說

俞氏皋曰不書月史闕文也

附錄左傳

六年春晉蒐於夷舍二軍使狐射姑將中軍趙盾佐之陽處父至自溫改蒐於董易

中軍陽子成季之屬也故黨於趙氏且謂趙盾能曰使能國之利也是以上之宣子於是乎始爲國政制事典正法罪辟獄刑董逋逃由質要治舊濇本秩禮續常職出滯淹既成以授大傅陽子與大師賈佗使以爲常法行諸晉國

夷杜注晉地董杜注河東汾陰縣有董亭汾陰今絳州屬山西平陽府有董澤在聞喜縣東北四

十里接絳州界

夏季孫行父如陳

左傳

臧文仲以陳衛之睦也欲求好於陳夏季文子聘於陳且娶焉

集說

杜氏預曰臣非君命不越竟故因聘而自爲娶
范氏甯曰行父季友孫黃氏仲炎曰春秋

書內大夫出聘者其旨有四有書以見簡禮者有書
以見諂禮者有書以見大夫專命者有書以見大夫
私行者所謂簡禮者公子遂如京師叔孫得臣如京
師之類是也諸侯不朝而使大夫聘也諂禮者季孫
行父如晉繼於公孫敖如晉之明年之類是也使幣
頻煩而不知節也大夫專命者公子遂叔孫得臣如
齊之類是也非君命而行也大夫私行者公子友如
陳公孫茲如年季孫行父如陳之類是也蓋公子友
以原仲之舊而茲行父以娶婦之故於是託君命以
遂其私也吳氏澂曰此亦行父欲迎婦於陳而請
於君借聘禮以行前此魯陳未嘗有邦交也汪氏
克寬曰季友如陳者再今行父之往蓋因其祖之舊
好假公室之聘而圖婚耳春秋特書公子友葬原仲
而行父之娶於陳公孫茲娶於年嬰齊娶於莒皆止

書如所以貶季友之私行而不予行父茲嬰齊因聘以濟其私欲也自逆猶可教如莒涖盟而代弟逆姑聘宋而爲意如逆則又甚矣

附錄左傳

秦伯任好卒以子車氏之三子奄息仲行鍼虎爲殉皆秦之良也國人哀之爲之賦

黃鳥君子曰秦穆之不爲盟主也宜哉死而棄民先王違世猶詒之法而況奪之善人乎詩曰人之云亡邦國殄瘁無善人之謂若之何奪之古之王者知命之不長是以竝建聖哲樹之風聲分之采物著之話言爲之律度陳之藝極引之表儀予之法制告之訓典教之防利委之常秩道之以禮則使毋失其土宜衆隸賴之而後即命聖王同之今縱無法以遺後嗣而又收其良以死難以在上矣君子是以知秦之不復東征也

秋季孫行父如晉

左傳

秋季文子將聘於晉使求遭喪之禮以行其人曰將焉用之文子曰備豫不虞古之善教也求

而無之實難過求何害

集說

朱子曰季文子三思而後行如使晉而求遭喪之禮以行亦其一事也汪氏克寬曰王制諸

侯於天子比年一小聘三年一大聘五年一朝文公即位六年君朝於晉者再而貴卿比年往聘過於事天子之禮而京師之朝終其世不見於經蓋諸侯知有霸主而不知有王也黃氏正憲曰季文子專執國政不能以禮佐其君乃與敖相繼出聘阿結彊援故既書如陳又書如晉所以著其私交樹黨爲三家僭竊之漸也

八月乙亥晉侯驩卒

驩喚官反
公作驩

左傳

八月乙亥晉襄公卒靈公少晉人以難故欲立長君趙孟曰立公子雍好善而長先君愛之且

近於秦秦舊好也置善則固事長則順立愛則孝結舊則安爲難故故欲立長君有此四德者難必抒矣

賈季曰不如立公子樂辰嬴嬖於二君立其子民必安之趙孟曰辰嬴賤班在九人其子何震之有且爲

二嬖淫也爲先君子不能求大而出在小國辟也母淫子辟無威陳小而遠無援將何安焉杜祁以君故

讓偁姑而上之以狄故讓季隗而已次之故班在四先君是以愛其子而仕諸秦爲亞卿焉秦大而近足

以爲援母義子愛足以威民立之不亦可乎使先蔑士會如秦逆公子雍賈季亦使召公子樂於陳趙孟

使殺諸郕

郛杜注晉地博物記垣縣有郛郛之阮今河南懷慶府濟源縣西一百里有郛亭唐置郛元縣於此

與山西垣曲縣接界

集說

李氏琪曰齊孝公不能率桓公之烈晉襄能繼晉文之統孝公初宋有抑齊之志襄公初秦懷

駕晉之謀宋啟願之爭秦尋殺之釁此皆爭霸之端也孝公不能抗宋而襄公首能挫秦此晉之所以未失伯也文公之沒三彊並興秦雄西陲狄獮北師楚復彊於南苟縱一敵則晉伯去矣襄公夏戰殺以却秦狄敗箕以翦狄冬伐許以離楚一年之間三敵悉退亦可謂有伯者之略此其能繼文者也苟有伯者之略則襄公之烈何爲僅止乎此曰外患既息舉動即異伐衛則損威矣會公孫敖則毀列矣士穀主盟則權散矣處父救江則謀怠矣越一二載事不逮初况能持久乎是以君子不貴速成而圖全於其終不

志小利而慮患於其遠襄之規模又後於文公甚矣

冬十月公子遂如晉

葬晉襄公

左傳

冬十月襄仲如晉葬襄公

集說

杜氏預曰卿共葬事文襄之制也三月而葬速孔氏穎達曰昭三十年傳曰先王之制諸侯

之喪士弔大夫送葬昭三年傳曰昔文襄之霸也其務不煩諸侯君薨大夫弔卿共葬事是也汪氏克

寬曰鄭子大叔曰先王之制諸侯之喪士弔大夫送喪稽之於經前此未有使卿送葬者雖桓文之霸止

遣微者會葬蓋晉文昉爲霸令使大夫弔卿共葬事故叔孫婁葬平公季孫意如葬昭公駟致少姜以妾

勝而諸侯使卿會葬矣又曰趙盾患秦之送公子雍欲禦秦師故急於襄事季氏本曰晉自襄以後書

葬者悼平昭頃皆甫三月不知其故豈其意在速定嗣君而遂以爲常制歟

晉殺其大夫陽處父晉狐射姑出奔狄

射殺作夜

左傳

賈季怨陽子之易其班也而知其無援於晉也九月賈季使續鞠居殺陽處父十一月丙寅晉

殺續簡伯賈季奔狄宣子使史駢送其帑夷之蒐賈季戮史駢史駢之人欲盡殺賈氏以報焉史駢曰不可吾聞前志有之曰敵惠敵怨不在後嗣忠之道也夫子禮於賈季我以其寵報私怨無乃不可乎介人之寵非勇也損怨益仇非知也以私害公非忠也釋此三者何以事夫子盡具其帑與其器用財賄親帥扞之送致諸竟

公羊

晉殺其大夫陽處父則狐射姑昌爲出奔射姑殺也射姑殺則其稱國以殺何君漏言也其漏

言奈何君將使射姑將陽處父諫曰射姑民衆不說不可使將於是廢將陽處父出射姑入君謂射姑曰陽處父言曰射姑民衆不說不可使將射姑怒出刺陽處父於朝而走

穀梁

稱國以殺罪累上也襄公已葬其以累上之辭言之何也君漏言也上泄則下闇下闇則上聾

且闇且聾無以相通夜姑殺者也夜姑之殺奈何曰晉將與狄戰使狐夜姑爲將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰吾始使盾佐女今女佐盾矣夜姑曰敬諾襄公死處父主竟上事夜姑使人殺之君漏言也故士造辟而言說辭而出曰用我則可不用我則無亂其德則

胡傳

公羊子曰晉殺其大夫陽處父則狐射姑曷爲出奔射姑殺也射姑殺則其稱國以殺何君漏

言也易曰不出戶庭无咎何謂也子曰亂之所生則言語以爲階君不密則失臣臣不密則失身幾事不密則害成是以君子慎密而不出也凡書殺者在上則稱君在下則稱氏在衆則稱人在微則稱盜君與臣同殺則稱國今殺處父者射姑耳君獨以漏言故亦預殺焉所以爲後世戒也或以處父爲侵官非歟曰人君用人失當則其國必危凡立於朝者舉當諫君況身爲晉國之太傅邪若以爲侵官將相大臣非其人百官有司失其職在位者當拱默自全隱聽人主之所爲至於顛危而不救則將焉用彼相乎率天下臣子爲持祿容身不忠之行以誤朝迷國者必此侵官之說夫

集說

范氏甯曰親殺者夜姑而歸罪於君明由君言而殺之罪在君也劉氏故曰左氏曰侵官也

案左氏此事始末罪處父獨有稱趙宣子爲能耳改
蒐易將凡出晉侯何以謂處父侵官邪人君任賢不
稱必將致敗苟食祿者舉當諫君況處父晉國太傅
邪以此爲侵官是教大臣爲拱默也如使大臣見賢
而舉謂之侵官見賢而不舉乃其職矣不亦謬乎
孫氏覺曰春秋殺大夫之例自下殺之者稱人自君
殺之者稱國襄公既卒新君方幼殺之者決非其君
然書之以君殺之爲文蓋公穀之說以爲其君漏言
而狐射姑殺之君漏言而處父見殺焉則殺之者君
耳非身殺之而以告言殺之亦等爾亦何論君亡乎
二傳之說皆是王氏葆曰詩曰紹庭上下陟降厥
家謂人君陞黜大臣當由直道也襄公儻以下陟降厥
正之道上下其臣雖予奪不盡當人亦退聽而無所
歸咎今乃漏言於射姑嫁怨於處父則是處父之罪
襄公致之矣高氏閏曰先書晉殺處父繼書射姑
出奔則實殺處父之罪自著矣陳氏傳良曰兩下

相殺其書國殺何春秋之法苟有賊而不知則其君之罪也是故晉胥童殺三卻樂書中行偃殺胥童齊崔杼殺高厚鄭子辰子西殺公子嘉皆稱國而已矣張氏洽曰據左氏則若晉國之事一聽於陽處父者及考穀梁所謂君漏言則是易中軍乃處父密言於襄公公不能謹而輕漏之以致射姑之殺處父春秋所以分其殺於君與大夫也家氏鉉翁曰射姑以私怨殺一大夫其罪固當誅而處父以私意黨趙氏使盾由是爲政於晉擅廢立專刑賞其末流遂有弑君之事然則處父固當言言而以私乃其罪也吳氏澂曰是時襄公已卒而書國殺者若曰處父今日之死實襄公殺之也

閏月不告月猶朝于廟

告音

左傳

閏月不告朔非禮也閏以正時時以作事事以厚生生民之道於是乎在矣不告閏朔棄時政

也何以
爲民

穀梁

不告月者何
也不告朔也

胡傳

不告月者不告朔也不告朔則曷爲不言朔也
因月之虧盈而置閏是主乎月而有閏也故不

言朔而言月占天時則以星授民事則以節候寒暑
之至則以氣百官修其政於朝庶民服其事於野則
主乎是焉耳矣閏不可廢乎曰迎日推策則有其數
轉璣觀衡則有其象歸奇於扚以象閏數也斗指兩
辰之間象也象數者天理也非人所能爲也故以定
時成歲者唐典也以詔王居門終月者周制也班告
朔於邦國不以其爲附月之餘而弗之數也猶朝于
廟者幸其不已之辭子貢欲去告朔之餼羊子曰爾
愛其羊我
愛其禮

集說

何氏休曰禮諸侯受十二月朔政於天子藏於大祖廟每月朔朝廟使大夫南面奉天子命君

北面而受之比時使有司先告朔謹之至也受於廟者孝子歸美先君不敢自專也言朝者緣生以事死親在朝朝莫夕已死不敢渫鬼神故事必於朔者感月始生而朝杜氏預曰諸侯每月必告朔聽政因朝宗廟文公以閏非常月故闕不告朔急慢政事孔氏穎達曰論語云子貢欲去告朔之餼羊是用特羊告於廟謂之告朔人君即以此日聽視此朔之政謂之視朔十六年公四不視朔僖五年傳曰公既視朔是也視朔者聽治此月之政亦謂之聽朔玉藻云天子聽朔於南門之外是也其日又以禮祭於宗廟謂之朝廟周禮謂之朝享其歲首爲之則謂之朝正襄二十九年正月公在楚傳曰釋不朝正於廟是也告朔視朔聽朔朝廟朝享朝正二禮各有三名同日而爲之也文公以閏非常月故闕不告朔啖氏助

曰公穀言不告月爲是非也案經文言不告月明當告也孫氏復曰春秋二百四十二年閏月多矣獨此書不告月者是常告也文既不告閏月猶朝於廟非禮可知劉氏敞曰諸侯歲受朔於天子退而歲之祖廟朔告月於祖廟退而班之百官正也閏不告月非正也朝廟爲告月也不告月而朝廟亦非正也又曰公羊謂不告朔禮也猶朝於廟非禮也非也閏雖無常而政有常安得不告假令閏十二月者必有立春立春之政所當告也若就前月告之則先時若就後月告之則不及時夏書曰先時者殺無赦不及時者殺無赦由是觀之則自當告也杜氏諤曰春秋志文公廢告朔而猶朝廟是幸其禮不盡廢聖人愛禮之深意也蘇氏轍曰春秋蓋有同辭而異實者矣猶三望猶繹可以已也猶朝於廟幸其不已也王氏葆曰不曰朔而曰月蓋朔者月之初告而月則積日而成也以閏月而不告則一月之政俱不舉

聖人變文而書爲怠政而設也 高氏閏曰苟知朝廟之不可已則告月之禮曷爲而可已哉 朱子曰閏者所以定四時成歲天子以爲月而頒之爲諸侯而不奉以告是輕正朔而慢時令也公穀以爲附月之餘日又曰天子不以告朔此說已非而猶字之義諸傳皆以爲可已之辭大率皆譏其舍大政而謹小禮獨胡傳以爲幸其不已之辭以我愛其禮證之則此義精矣 黃氏仲炎曰自文公怠棄時政以閏月爲非常月而廢告月之禮漸致其後雖常月亦不告矣此子貢所以欲去告朔之餼羊也 汪氏克寬曰有朔而無中者爲閏月月有晦朔則自然有閏無閏則失月行之數故曰主乎月而有閏也日月所會是謂辰以厯言之則是積餘分而置閏以日月星辰觀之則閏月日月亦會於辰與他月無以異也又曰周天三百六十五度四分度之一日一日一周在天爲不及一度積三百六十五日四分日之一而與天會

爲一歲月一日不及天十三度十九分度之七積三百五十四日九百四十分日之三百四十八而與日會者十二爲一年大率三百六十日爲常數一歲多五日九百四十分日之二百三十五分爲二十四氣是爲氣盈而晝夜長短節氣寒暑於是定焉一年少五日九百四十分日之五百九十二分爲十二月是爲朔虛而晦朔弦望於是定焉積歲之有餘就年之不足而後有閏三年一閏尚餘三日有奇五年再閏則少五日有奇積十九年閏在十二月則氣朔分齊大率三十二月則有閏閏前之月中氣在晦閏後之月中氣在朔若歷不置閏則弦望晦朔皆非其正晝夜平分不在春秋之中而寒暑反易矣故書云以閏月定四時成歲周禮注中數曰歲朔數曰年中朔大小不齊正之以閏乃天地自然之理歷家因其自然而立積分之數以合之耳公羊謂閏月天無是月穀梁謂附月之餘日皆非是夫二十九日九百四十分

日之四百九十九而晦朔交則爲一月月非有閏之名特以日月行天疾徐之不同而歲年盈縮之有異遂謂之閏天與日月之行自然有閏豈可謂天無是月哉月非有餘也又豈可謂附月之餘哉月之有閏則由乎天而月之名閏乃由於人故於文王在門爲閏禮稱天子閏月則聽朔於明堂闔門左扉立於其中王之謹乎閏月者如此而諸侯安可不告月哉考之經傳凡言閏月多在歲終蓋是時厯法謬矣每置閏於歲終故左傳以閏三月爲非禮則無中者不謂之閏而名曰閏者非閏月矣秦之後九月實傲於此是宜當時之卿大夫以天無是月指爲厯家所置而導其君廢告朔之禮也說經者且曰天子不告朔尚何責昏庸之魯文也哉春秋書猶朝廟即聖人愛禮存羊之意謂朔雖不告而朝廟不廢則告朔之禮猶有存者公穀皆曰猶者可以已也杜預亦云可止之辭大失春秋之意蓋聖人傷魯文之急慢政事故特

書不告月猶朝於廟若曰不如此而尚幸其如此將已而不遂已是知其不可已而自不能已也與猶三望猶繹之義不同嚴氏啓隆曰此閏月閏十二月也經書閏月者二皆在十二月

辛襄王三年七年晉靈公夷皋元年齊昭十三年衛成十

十二年陳共十二年杞桓十七年宋成十七年秦康公瑩元年楚穆六年

春公伐邾

左傳七年春公伐邾間晉難也

集說杜氏預曰公因霸國有難而侵小

三月甲戌取須句句公作胸

左傳

三月甲戌取須句寘文公子焉非禮也

集說

杜氏預曰絕太皞之祀以與鄰國叛臣僖公反其君之後邾復滅之今邾文公子叛邾在魯故

公使爲守須句大夫孫氏復曰惡再取也案僖二十二年公伐邾取須句後其地復入於邾劉氏敞曰公羊曰取邑不日此何以內辭也使若他人然非也僖公時亦嘗伐邾取須句矣何不爲內辭哉穀梁曰取邑不日此其日何也不正其再取故謹而日之非也設不日則聽其取乎諸取邑不日者皆聽之矣黃氏仲炎曰齊靈公與臧紇言伐晉臧紇對曰抑君似鼠夫鼠晝伏夜動不穴於寢廟畏人故也今君聞晉之亂而後作焉非鼠而何觀魯文公聞晉難而伐邾取邑是亦臧紇之所謂鼠者爾汪氏克寬曰僖公雖曰私其母家猶有崇明祀保小寡之義文公乘霸國之喪貪土地而舍遁逃其罪益甚矣

遂城部

部音吾 部杜注魯邑卞縣南有部城今在山東兗州府泗水縣東南

穀梁

遂繼事也

集說

杜氏預曰因伐邾師以城部備邾難 孫氏復曰遂城部重勞民也 趙氏鵬飛曰僖公蓋嘗

伐邾取須句矣其後復歸之今文公效尤復伐而取焉僖公有善文弗率也僖公之失必履其轍吾於此尤見文之不子矣既伐邾取邑師徒亦頓敝又遂城部文公以爲既伐邾以攘邾之邑不可不城部以備邾之兵是一舉而兩得也其亦念兵之勞而民之疲歟况三月今之正月東作之時而奪農時則一歲之獲荒矣文公何以爲國乎 汪氏克寬曰文公以邾叛臣守須句之地又重勞民力城內邑以防邾師之至心有嫌焉故畏鄰國之伐而不知愈重其過也

夏四月宋公王臣卒

穀作士臣

集說

高氏閌曰以國亂故不葬凡治則禮詳亂則禮略家氏鉉翁曰不書葬責嗣子輕舉召亂葬

不如禮

汪氏克寬曰其弟禦殺世子而自立國人殺禦而立其少子杵臼是爲昭公季氏本曰昭公

初立羣族亂作於是送終之禮廢矣故凡不書葬者非皆由魯不會亦有其國葬不備禮而謝絕諸侯者

宋成公是矣

宋人殺其大夫

左傳

夏四月宋成公卒於是公子成爲右師公孫友爲左師樂豫爲司馬鱗隲爲司徒公子蕩爲司

城華御事爲司寇昭公將去羣公子樂豫曰不可公族公室之枝葉也若去之則本根無所庇廕矣葛藟

猶能庇其本根故君子以爲比況國君乎此諺所謂庇焉而縱尋斧焉者也必不可君其圖之親之以德皆股肱也誰敢携貳若之何去之不聽穆襄之族率國人以攻公殺公孫固公孫鄭於公宮六卿和公室樂豫舍司馬以讓公子卬昭公即位而葬書曰宋人殺其大夫不稱名衆也且言非其罪也

胡傳

書宋人者國亂無政非君命而衆人擅殺之也大夫不名義繫於殺大夫而其名不足紀也

集說

杜氏預曰不稱殺者及死者名殺者衆死者無罪又曰二子在公宮爲亂兵所殺趙氏匡曰

以三世內娶便云三世無大夫公羊之說不近人理若實殺有罪何以不書死者之名乎穀梁之說非也陸氏淳曰非君意而殺之者衆不可書名特加人字以別之又明死者無罪高氏閌曰貶責無所寄直志其衆亂無政而已陳氏傅良曰終昭公之世不名其大夫春秋有天下之辭有一國之辭有一人

之辭於晉靈公凡會盟皆不序諸侯是天下之辭也
於魯莊公凡會齊襄皆書人是一國之辭也於魯桓
公凡大夫將皆不言大夫於宋昭公凡大夫不名是
一人之辭也吳氏澂曰穆襄之族率國人人衆非
一人也故稱宋人死者不幸而遭亂兵非有可殺之
罪故不書名注氏克寬曰宋昭方居諒陰明年復
殺司馬而逐司城經書宋公王臣卒宋人殺其大夫
明年又書宋人殺其大夫司馬宋司城來奔以見嗣
君之無政先君在殯而國人作亂以戮其大夫踰年
而掌兵之官見誅守國之官見逐皆書宋人而昭公
之為君可知矣曾未十年而有帥甸之弑經以大惡
繫之宋人所以備責昭公不足為宋人之君也余
氏光曰成公在殯昭公首為亂階至使公族構難大
夫罹殃其不君甚矣然則固與鄭也何以不名是必
從君於昏者他日昭公被弑蕩意諸不得
與孔父仇牧苟息齒即大夫不名之義也

戊子晉人及秦人戰于令狐晉先蔑奔秦

令力呈反蔑公作昧奔上

有以師字

左傳

秦康公送公子雍於晉曰文公之入也無衛故有呂卻之難乃多與之徒衛穆嬴曰抱大子以

啼於朝曰先君何罪其嗣亦何罪舍嫡嗣不立而外求君將焉寘此出朝則抱以適趙氏頓首於宣子曰先君奉此子也而屬諸子曰此子也才吾受子之賜不才吾惟子之怨今君雖終言猶在耳而棄之若何宣子與諸大夫皆患穆嬴且畏偁乃背先蔑而立靈公以禦秦師箕鄭居守趙盾將中軍先克佐之荀林父佐上軍先蔑將下軍先都佐之步招御戎戎津為右及董陰宣子曰我若受秦秦則實也不受寇也既不受矣而復緩師秦將生心先人有奪人之心軍之善謀也逐寇如追逃軍之善政也訓卒利兵秣馬虜

食潛師夜起戊子敗秦師于令狐至於創首已丑先
蔑奔秦士會從之先蔑之使也荀林父止之曰夫人
大子猶在而外求君此必不行子以疾辭若何不然
將及攝卿以往可也何必子同官為寮吾嘗同寮敢
不盡心乎弗聽為賦板之三章又弗聽及亡荀伯盡
送其帑及其器用財賄於秦曰為同寮故也士會在此
秦三年不見士伯其人曰能亡人於國不能見於此
焉用之士季曰吾與之同罪非義之也將何見焉及
歸遂不見

董陰杜注晉地創首杜注令狐在河東與創首
相接案令狐今平陽府猗氏縣地水經注創首在
西三十里當在今
榮河臨晉間也

公羊

何以不言師敗績敵也
何以不言出遂在外也

穀梁

不言出在外也戰而奔秦以是爲逃軍也

胡傳

案左氏襄公卒太子幼晉人欲立長君趙孟使先蔑如秦逆公子雍秦康公以師納之襄夫人

日抱太子以啼於朝曰舍適嗣不立而外求君將焉寘此諸大夫畏逼乃背先蔑立靈公趙盾將中軍以

禦秦潛師夜起敗秦師于令狐先蔑奔秦程氏以爲晉不謝秦秦納不正皆罪也故稱人晉懼秦之不肯

已而擊之是晉人爲志乎是戰者也故書及其貶之如此者使後世臣子慎於廢立之際不可忽也治亂

存亡繫國君之廢立事莫重於此矣而可以有誤乎奕者舉棋不定不勝其耦况置君而可以不定乎

集說

孫氏復曰秦晉自殽之役結怨用兵償報不已故自是不復名將帥但曰某人某人而已言戰

不言敗者勝負敵也先蔑書者不可言晉人故也不言出者明自軍中而去王氏沿曰既貶宣子又貶

秦伯罪各當誅陳氏傅良曰宋襄公納齊孝公戰于顯敗稱師秦康公送晉公子雍戰于令狐貶稱人秦晉之交兵於是再世自令狐之後不悉書矣八年秦伐晉取武城不書十年晉伐秦取少梁不書張氏洽曰如左氏說則當書晉人敗秦師于令狐今書晉及秦戰又不言敗者交貶之也然二國之兵晉曲尤甚故秦伯趙盾皆稱人而特以晉及且不書秦師之敗深罪晉人置君而不定也黃氏仲炎曰平其心以觀天下之故則是非利害未嘗不甚明一或銅於貪欲之私則如逐鹿者不見泰山矣觀荀林父之戒先蔑者平心之言也故卒不逃其所料惟先蔑之意在於覬覦立君之功而不暇擇焉將以求福乃更得禍此可爲行險者之戒矣汪氏克寬曰晉襄以前年八月卒十月葬矣秦人豈不知其已立君而至是始納公子雍耶蓋趙盾始議求長君而中變其說秦人雖知其立靈公而欲以重兵彊納公子雍以爭

國也夫康公姑爲天子送舅氏而念母之不見故作
渭陽之詩是固良心也今乃納庶孽而奪嫡甥之位

自是兵爭不息豈非怨欲害乎良心而然歟不然春秋釋秦而專罪趙盾矣

案公羊此偏戰也又云此晉先昧也其稱人何貶曷
爲貶外也其外奈何以師外也以是戰爲偏戰而以
晉人爲指先昧是不知晉三軍之在行而將中軍者
之爲趙盾也然先蔑既將下軍而又奔秦即以爲逃
軍亦可故刪節
公羊而存穀梁

狄侵我西鄙

左傳

狄侵我西鄙公使告於晉趙宣子使因賈季問
鄆舒且讓之鄆舒問於賈季曰趙衰趙盾孰賢

對曰趙衰冬日之日也趙盾夏日之日也

集說

許氏翰曰狄懲箕之敗四年間一侵齊而未敢肆至是復侵魯侵齊侵宋侵衛晉襄既沒莫之

忌矣

高氏閏曰魯間晉難而伐邾則狄亦間晉難

而侵魯聖人書此罪魯之不自正也張氏洽曰間

秦晉之爭也湛氏若水曰晉襄既沒霸業陵替秦

晉交爭狄人窺伺其間大肆內侵故侵魯侵齊侵宋

侵衛之事

漸見矣

秋八月公會諸侯晉大夫盟于扈

扈杜注鄭地滎陽卷縣西北有扈亭今在

河南開封府原武縣西北

左傳

秋八月齊侯宋公衛侯陳侯鄭伯許男曹伯會晉趙盾盟于扈晉侯立故也公後至故不書所

會凡會諸侯不書所會後也後至不書其國辟不敏也

穀梁

其曰諸侯略之也

胡傳

諸侯會晉趙盾盟于扈爲晉侯立也諸侯不序見公之不及於會也文公怠惰事多廢緩既約

晉盟而復後至故隱其不及罪公之不能自彊於政治魯自是日益衰矣

集說

趙氏匡曰諸侯不序公不得與之盟也而曰公會諸侯盟者言公附於載書也載書不可從附

與盟

主之大夫敵焉也責公不早赴而自取其恥爾劉氏敞曰公羊曰諸侯不可使與公盟眡晉大夫

使與公盟非也在會者皆諸侯也既與公盟矣又何云眡晉大夫乎且諸侯不欲與魯侯盟乃敢眡晉大

夫使之盟乎皆事之不然者也孫氏覺曰春秋書及某大夫盟者惟二例耳莊九年公及齊大夫盟于

莒及此晉大夫是也莒之盟齊襄被弑而無知見討小白在外而未入齊方無君齊之大夫不求盟以紓

國之難則安危未可知於是權宜與公盟齊無君大夫盟公非大夫之罪是以不名而曰齊大夫也晉襄已葬靈公尚幼晉之大夫求盟諸侯以紹先君之業而諸侯皆會晉之嗣君幼不能盟則大夫權宜而盟諸侯以大夫伉諸侯則有罪矣然不幸而值幼君則不可不假一時之權是以不名而曰晉大夫也春秋之法外臣而盟我君皆書名以見其罪不幸其國無君若無知之亂則齊之大夫得免焉大夫而盟諸侯亦書其名以見其罪不幸其君薨而嗣子少若靈公之在抱則晉之大夫得免焉舍是二者未有不得罪於春秋者矣春秋之法前目後凡扈之盟不序而前無所見以晉之大夫不名不以諸侯之序而敵一大夫也春秋通晉大夫之得盟諸侯是以不列諸侯之爵也程子曰文公急政事多廢緩既約晉盟而復後至故書往會而隱其不及不序諸侯以見其不在故明年公子遂再往與晉盟也許氏翰曰諸侯何

以不序大夫何以不名大夫而主盟諸侯自扈之會始也吳氏澂曰經書諸侯者皆前目後凡此年以前竝無諸國之目若無左傳則不知其為齊宋衛陳鄭許曹七國之君不列叙諸國而但言諸侯以無盟主而大夫彊合諸國之君故略之也李氏廉曰文公之編三會于扈皆止書諸侯左氏以十五年盟扈書諸侯無能爲也十七年會扈書諸侯無功也是則總稱諸侯者皆罪諸侯也此總稱諸侯爲公後至也諸侯皆在公獨後至故諱公罪而歸責於諸侯若言諸侯無功然所以辟公之不敏也汪氏克寬曰經書大夫之盟不書名氏者三莊公九年書及齊大夫盟時襄公已弑桓公未入齊無君當國大夫自為主而與莊公盟故大夫不書名氏此年趙盾初立靈公亦若晉無君然故趙盾亦不書名氏溴梁之會諸侯皆在而十一國之大夫自盟則諸國皆若無君矣故亦但書大夫盟扈之盟書晉大夫霸主失政也溴梁

之盟書大夫則諸侯皆失政矣

案諸侯不序左氏以爲公後至劉氏敵孫氏覺皆駁之劉氏又謂諸侯不序爲欲治宋而後不能與十五年盟扈十七年會扈左氏所謂諸侯無能爲諸侯無功者其意相合似亦有理然趙氏匡胡氏安國皆主左氏而程子又引遂會衡雍討扈後至爲證故今仍從左氏焉趙盾不名胡傳謂盾內專廢置其君外疆諸侯爲此盟故略而不名非也盾自新城以後皆以名書惟此年盟扈以主幼而得無貶耳孫氏覺之說得之矣

冬徐伐莒

集說

劉氏敞曰杜云不書將帥徐告辭略非也傳云徐伐莒莒來請盟然則莒來告也且徐不來告

則已苟其來告若不稱君必當稱將帥豈亦自云徐而已乎杜氏之意固以謂從赴告而向者晉人戰于今狄又何云

貶趙盾稱人哉

公孫敖如莒涖盟

公穀作莒

左傳

穆伯娶於莒曰戴已生文伯其娣聲已生惠叔戴已卒又聘於莒莒人以聲已辭則爲襄仲聘

馬冬徐伐莒莒人來請盟穆伯如莒莒盟且爲仲逆及鄆陵登城見之美自爲娶之仲請攻之公將許之叔仲惠伯諫曰臣聞之兵作於內爲亂於外爲寇猶及人亂自及也今臣作亂而君不禁以啟寇讎若之何公止之惠伯成之使仲舍之公孫敖反之復爲兄弟如初從之

穀梁

莒位也何也前定也

集說

高氏閼曰莒爲徐所伐故來求援而請修泚之盟教娶於莒故許其盟而請往涖之趙氏鵬

飛曰魯有徐之患久矣自伯禽受國而有費誓之師入春秋服於齊桓之令而不敢仇於諸侯今霸王不作徐將爲魯患彼其伐莒蓋所以撼魯也公孫敖於是往盟於莒修僖公泚向之好協謀以備徐也吳氏澂曰魯臣每欲娶婦必請於君行聘會之禮假公事以遂其私君之無政臣之無禮也况教代弟逆名尤不正卒以淫奔禽獸之行也湛氏若水曰莒以弱小之國見伐於徐公孫敖如盟以救之似禮矣而教之意不在於救莒因盟莒以爲迎娶之地假公以圖私濟邪以害正故春秋書之使人考其跡知其心而非禮自見矣

附錄左傳

晉卻缺言於趙宣子曰日衛不睦故取其地今已睦矣可以歸之叛而不討何以示

威服而不柔何以示懷非威非懷何以示德無德何以主盟子為正卿以主諸侯而不務德將若之何夏書曰戒之用休董之用威勸之以九歌勿使壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮無禮不樂所由叛也若吾子之德莫可歌也其誰來之盍使睦者歌吾子乎宣子說之

壬襄王三十八年晉靈二年齊昭十四年衛成十六年蔡
寅十三年莊二十七年鄭穆九年曹共三十四年
陳共十三年杞桓十八年宋昭公
杵臼元年秦康二年楚穆七年

春王正月

附錄左傳八年春晉侯使解揚歸匡戚之田於衛且復致公壻池之封自申至於虎牢之竟

申杜注鄭地當在
鄭州汜水縣界

夏四月

附錄左傳

夏秦人伐晉取武城以報令狐之役

秋八月戊申天王崩

左傳

秋襄王崩

集說

史記襄王崩子頃王士臣立頃王六年崩陸氏淳曰頃王不書崩

冬十月壬午公子遂會晉趙盾盟于衡雍

盾徒本反雍於用反

左傳

晉人以扈之盟來討冬襄仲會晉趙孟盟于衡雍報扈之盟也

集說

高氏閔曰衡雍晉文公會諸侯朝王之處也夫天王崩諸侯不奔喪而盾遂皆國之正卿乃自

相會盟於王畿之內惡莫大焉

任氏公輔曰晉魯

之用事者會盟政在大夫矣

張氏洽曰後漢河南

卷縣有垣顗城古衡雍也與扈相近自晉文翟泉之

盟付之諸大夫文公復以國事付之公子遂而不知

一國之禮樂征伐皆自公子遂出此敬嬴所以得窺

伺間隙私事之以胚胎殺適立庶之禍也汪氏克

寬曰大夫專盟始此前此盟翟泉猶有僖公在會也

自是而有袞婁之盟雞澤溴梁諸侯皆在而大夫自

盟矣于宋于虢則晉楚大夫狎主齊盟而諸侯不復

在矣其事自衡雍之盟始也况當是時仲遂已有無

君之心而晉討文公之盟扈必要仲遂歃血而後信

亦猶成公之沙隨不得見而季孫行父會晉卻犇盟

于扈昭公弔少姜不見納而季孫宿如晉馴致乾侯

之次晉不能修方伯之職而意如會荀躒於適歷矣

三桓專魯六卿分晉
豈一朝一夕之故哉

乙酉公子遂會雒戎盟于暴

雒音洛雒戎公作伊雒戎
暴杜注鄭地路史曰暴

辛公米地
一曰暴隧

左傳

遂會伊
雒之戎

胡傳

春秋記約而志詳其書公子遂盟趙盾及
雒戎何辭之贊乎曰聖人所以別內外也

集說

劉氏敞曰左氏曰珍之也言遂權與戎盟得事
之宜故褒稱公子非也若兩稱公子爲褒者僖

三十年公子遂如京師遂如晉則貶矣彼不謂貶何
邪孫氏覺曰盟于衡雍盟于暴一公子遂耳士午

乙酉四日耳公子遂一人相去四日之間而行二事
於經可以言遂也然不曰遂者衡雍之盟與暴之盟

皆受命於其君而後行事非繼事之謂是以不曰遂也
蘇氏轍曰公子遂既盟趙盾四日而盟雖戎皆公命也何以知其皆公命也以其書雖戎之盟與書趙盾之盟一也
張氏洽曰盟盾未幾而遂會雖戎不以遂事言之所以辨內外也
李氏廉曰內大夫特盟外大夫二公子遂會晉趙盾盟衛雍季孫行父及晉卻犇盟于扈是也此皆權臣專行之事而此為造端春秋於翟泉歷貶諸國大夫而此無譏焉蓋不勝譏矣

公孫敖如京師不至而復丙戌奔莒

公無而字

左傳

穆伯如周弔喪不至以幣奔莒從已氏焉

胡傳

案左氏公孫敖奔莒從已氏也男女人之大欲存焉寡欲者養心之要欲而不行可以為難矣

教如京師其書不至而復者言教無入使於周之意惟己氏之欲從也

集說

陸氏淳曰還者事畢復者未畢師還公還自晉歸父還自晉士句聞齊侯卒乃還皆不當更往

又竝合禮故曰還事畢也公如晉至河乃復公孫敖如京師不至而復仲遂至黃乃復皆事未畢而復也

孫氏復曰公孫敖如京師弔喪也不至而復而戌奔莒文公不能誅敖得以自恣文公之惡亦可見矣

不言所至者舉京師爲重也劉氏敞曰何以不言出受命矣自外出也大夫受命而出君言不宿於家

臣子大受命則何以不言其至近也曷為或言而復或言乃復乃難乎而也朱子曰文定云色出於性

淫出於氣其說原於上蔡此殊分得不是大凡出於人身上道理固皆是性色固性也然不能節之以禮

制之以義便是惡孟子云君子不謂性其語便無病又曰只不至而復便是大不恭魯亦不再使人往皆

罪也文定只貶他從己氏之過經文原不及此事
張氏洽曰國君為天子斬衰教受命以赴天王之喪
廢君命而徒返已為不赦之罪况懷桑中之行而淫
奔乎文公容其復而奔魯之無政刑也宋氏宜春
曰公不奔喪而卿行是諸侯不有天子也教如京師
不至復是大夫不有諸侯也黃氏仲炎曰觀遂之
專教之恣則文公之不能制其臣可知矣汪氏克
寬曰教豈惟無王實以無君文公既不加璽命之譴
於教又不遣他卿如京師況天王之喪赴告及魯已
三越月仲遂盟戎近在王都之側若罔聞知徐徐遣
教方共弔事又且教不至而亟還以喪考妣之戚而
恕然忘情不啻秦越亦不思僖公母子之喪王臣將
命者至而而至三也經書乙酉公孫子遂會雖戎公孫
教如京師不至而復丙戌奔莒非獨著教之罪舉魯
國君臣之罪皆不
逃聖筆之誅矣

案不至而復經文甚明孫氏以為中道而返者得之
諸家謂受命不行者非也若果不行聖人何難據實
以書之乎

各

作公

集說何氏休曰先是公如晉公子遂公孫敖比出不
可使勢奪於大夫煩擾之應杜氏預曰為災

書故

宋人殺其大夫司馬宋司城來奔

左傳

宋襄夫人襄王之姊也昭公不禮焉夫人因戴
氏之族以殺襄公之孫孔叔公孫鍾離及大司

馬公子印皆昭公之黨也司馬握節以死司城蕩意
諸來奔效節於府人而出公以其官逆之皆復之

胡傳

初宋昭公將去羣公子樂豫以為不可遂舍司馬以讓公子卬則卬固昭公之黨欲專宋政而

昭公固欲以其弟卬自衛也夫司馬掌兵之官不選衆舉賢以素有威望為國人所畏服者使居其任乃欲寵其私昵鮮有不亡者矣公子卬蕩意諸皆以官舉者見主兵者不能其官至於見殺守土者不能其官至於出奔而其君不免失身見弑之禍宜矣

集說

劉氏敞曰司馬者何司城者何皆官舉也曷為皆官舉言不能其官也不能其官者何君弱政

亂彊臣擅命然則何以不名非國討也非國討則孰討之華孫殺之華孫逐之曰宋人殺其大夫司馬宋司城來奔何曰是卿也不能其官者非他人之罪也又曰左氏云司馬握節以死司城效節以出公以其官逆之故皆書官非也計司馬握節未如仇牧司城奉身以退不及苟息而左氏推彼二人為貶申此兩

人為賢輕重貿易莫甚於此且身居亂兵之中苟棄節偷生則為大罪握節而死人臣之常耳既無智力以禦亂又欲負節而私逃亦大罪也效節而出自求免罪而已未見可貴之美也魯公庸人不識大義則妄以其官逆之春秋亦何為珍之耶又曰公羊曰宋三世無大夫非也僖二十五年宋殺其大夫不舉名氏以謂宋無大夫也今此舉官亦云無大夫若實內娶無大夫者都無所舉是矣或官舉或不舉何哉又曰穀梁曰以其官稱無君之辭也鄭康成解云謂無人君之德皆非也既有大夫矣何謂無君又晉殺其大夫卻錡卻犇卻至並尸三卿亦可謂無君德者則曷為不以官稱之黎氏鏞曰司馬典兵之官而殺之司城扞禦之任而來奔則主勢孤矣宜昭公卒死於弑胡氏寧曰列國大夫未有書官者宋卿何以書程氏云宋王者之後得自命官故獨書爾不備書省詞也因公子叩蕩意諸不任二官之職華孫以逆

族而主兵權所謂因事之變者而書之亦猶魯之郊
禘云爾陳氏傳良曰未有書官者於是官從其官
司馬司城是也未有書字者於是字從其字子哀是
也張氏洽曰司城司空也宋以武公名司空諱之
故曰司城黃氏仲炎曰紀綱不立政權紛亂則君
臣不能相保且仕於亂邦濫嬰戮辱非君子見幾之
道也垂戒之義明矣家氏鉉翁曰司馬司城皆國
之柄臣穆襄之族連歲估亂固昭公有以致之然爲
司馬司城者當思所以防患之計乃置之弗戒至於
乘釁再鮮司馬死而司城奔由昭公信任非人以私
昵寵臣而在列位既不慮患於平日復不制變於臨
時也吳氏澂曰宋人者戴氏之族非一人也見昭
公無政而臣庶得以擅殺大夫也賀氏仲軾曰殺
其大夫所以志亂也而此則專舉二人華督之事則
書及其大夫仇牧所以志節也而此不稱名氏特變
文以官書之者蓋以其官責之也且見司馬非人所

得殺之官而司城亦非
意諸所得奔之官也

案大夫者階也司馬司城者官也宋殺大夫司馬宋
司城來奔猶云殺其大夫中之司馬而大夫中之司
城來奔耳大夫貫下司馬司城言攷之周官卿非一
人有大夫宰大司空大宗伯等大夫亦非一人有小宰
小司徒小宗伯
等可以知矣

附錄左傳

夷之蒐晉侯將登箕鄭父先都而使士穀
梁益耳將中軍先克曰狐趙之勲不可廢

也從之先克奪蒯得田於董陰故箕
鄭父先都士穀梁益耳蒯得作亂

欽定春秋傳說彙纂卷十七